

四庫全書

經部

欽定四庫全書

經部

欽定春秋傳說彙纂卷二十一

詳校官監察御史_臣陳化龍

給事中_臣溫常綬覆勘

總校官進士_臣繆琪

校對官中書_臣陳林

謄錄監生_臣顧永涵

欽定四庫全書

欽定春秋傳說彙纂卷二十一

甲定王

十有二年

晉景三年齊頃二年衛穆三年蔡文
十五年鄭襄八年曹文二十一年陳

成二年杞桓四十年宋文十
四年秦桓八年楚莊十七年

春葬陳靈公

公羊

討此賊者非臣子也何以書葬君子辭也
楚已討之矣臣子雖欲討之而無所討也

胡傳

討賊者非臣子也何以書葬天下之惡一也本
國臣子或不能討而上有天王下有方伯又其

次有四鄰有同盟有方域之諸侯與凡民皆得而討
之所以明大倫存天理也微舒雖楚討之陳之臣子

亦可以釋怨矣故得書葬君子辭也

集說

杜氏預曰賊討國復二十二月然後得葬汪氏克寬曰君子之心無私故討賊不問內外蓋

惡惡者天下之同情也

案討賊之義無間於內外故徵舒雖為楚殺而陳靈亦得書葬公羊是也賀氏仲軾謂見弑之君有能如禮赴告則書其葬亦是一說然於通經義例不符未可從也若趙氏鵬飛家氏鉉翁黃氏震以為靈公為淫黨所葬非國人葬之則尤謬矣

楚子圍鄭

左傳

春楚子圍鄭旬有七日鄭人卜行成不吉卜臨于大宮且巷出車吉國人大臨守陴者皆哭楚

子退師鄭人修城進復圍之三月克之入自皇門至
於達路鄭伯肉袒牽羊以逆曰孤不天不能事君使
君懷怒以及敝邑孤之罪也敢不惟命是聽其俘諸
江南以實海濱亦惟命其翦以賜諸侯使臣妾之亦
惟命若惠顧前好徼福於厲宣桓武不泯其社稷使
改事君夷於九縣君之惠也孤之願也非所敢望也
敢布腹心君實圖之左右曰不可許也得國無赦王
曰其君能下人必能信用其民矣庸可幾乎退三十
里而許之平潘尫
入盟子良出質

胡傳 案公羊傳例戰不言伐圍不言戰入不言圍滅
不言入書其重者楚子縣陳蓋滅之矣而經止
書入其於鄭也入自皇門至於達道蓋即其國都矣
而經止書圍曷為悉從輕典不著其憑陵之罪乎上
無天王下無方伯天下諸侯有臣弑君子弑父而楚
能討之雖憑陵上國近造王都之側猶從末減於以

見誅亂臣討賊子
正大倫之為重也

集說

高氏閔曰封陳侯者非楚本謀也不善而能改也故書入與鄭平者楚本謀也不為利謀所誘

故書圍

家氏鉉翁曰左傳謂鄭伯肉袒牽羊以迎

楚莊退三十里而與之盟蓋晉師已起聞而亟去非

得鄭而不取也李氏廉曰鄭自此從楚直至成五

年蟲牢之盟方向晉汪氏克寬曰據左氏公羊所

記鄭襄公屈服於楚禮卑辭巽以求免則楚陵暴亦

甚矣然其能不聽左右之言而退師許平薄於利而

不要其土則比於狡焉思啓封

疆者猶有改過遷善之美意也

夏六月乙卯晉荀林父帥師及楚子戰于邲晉師敗績

邲音弼

邲杜注鄭地今河南

開封府鄭州東六里有邲城

左傳

夏六月晉師救鄭荀林父將中軍先穀佐之士會將上軍郤克佐之趙朔將下軍欒書佐之趙

括趙嬰齊為中軍大夫鞏朔韓穿為上軍大夫荀首趙同為下軍大夫韓厥為司馬及河間鄭既及楚平桓子欲還曰無及於鄭而勦民焉用之楚歸而動不後隨武子曰善會聞用師觀釁而動德刑政事典禮不易不可敵也不為是征楚軍討鄭怒其貳而哀其卑叛而伐之服而舍之德刑成矣伐叛刑也柔服德也二者立矣昔歲入陳今茲入鄭民不罷勞君無怨讟政有經矣荆尸而舉商農工賈不敗其業而卒乘輯睦事不奸矣為教為宰擇楚國之令典軍行右轅左追蓐前茅慮無中權後勁百官象物而動軍政不戒而備能用典矣其君之舉也內姓選於親外姓選於舊舉不失德賞不失勞老有加惠旅有施舍君子小人物有服章貴有常尊賤有等威禮不逆矣德立刑行政成事時典從禮順若之何敵之見可而進知

難而退軍之善政也兼弱攻昧武之善經也子姑整軍而經武乎猶有弱而昧者何必楚仲虺有言曰取亂侮亡兼弱也洵曰於鑠王師遵養時晦耆昧也武曰無競惟烈撫弱者昧以務烈所可也彘子曰不可晉所以霸師武臣力也今失諸侯不可謂力有敵而不從不可謂武由我失霸不如死且成師以出聞敵彊而退非夫也命為軍帥而卒以非夫唯羣子能我弗為也以中軍佐濟知莊子曰此師殆哉周易有之在師之臨曰師出以律否臧凶執事順成為臧逆為否衆散為弱川壅為澤有律以如已也故曰律否臧且律竭也盈而以竭天且不整所以凶也不行之謂臨有帥而不從臨孰甚焉此之謂矣果遇必敗彘子尸之雖免而歸必有大咎韓獻子謂桓子曰彘子以偏師陷子罪大矣子為元帥師不用命誰之罪也失屬亡師為罪已重不如進也事之不捷惡有所分與其專罪六人同之不猶愈乎師遂濟楚子北師次於

郅沈尹將中軍子重將左子反將右將飲馬於河而
歸聞晉師既濟王欲還嬖人伍參欲戰令尹孫叔敖
弗欲曰昔歲入陳今茲入鄭不無事矣戰而不捷參
之肉其足食乎參曰若事之捷孫叔敖為無謀矣不捷
參之肉將在晉軍可得食乎令尹南轅返旆伍參言
於王曰晉之從政者新未能行令其佐先穀剛愎不
仁未肯用命其三帥者專行不獲聽而無上衆誰適
從此行也晉師必敗且君而逃臣若社稷何王病之
告令尹改乘轅而北之次於管以待之晉師在敖鄩
之間鄭皇戌使如晉師曰鄭之從楚社稷之故也未
有貳心楚師驟勝而驕其師老矣而不設備子擊之
鄭師為承楚師必敗彘子曰敗楚眼鄭於此在矣必
許之樂武子曰楚自克庸以來其君無日不討國人
而訓之于民生之不易禍至之無日戒懼之不可以
怠在軍無日不討軍實而申儆之于勝之不可保紂
之百克而卒無後訓之以若敖蚡冒筭路藍縷以啓

山林歲之曰民生在勤勤則不匱不可謂驕先大夫
子犯有言曰師直為壯曲為老我則不德而微怨於
楚我曲楚直不可謂老其君之戎分為二廣廣有一
卒卒偏之兩右廣初駕數及日中左則受之以至於
昏內官序當其夜以待不虞不可謂無備子良鄭之
良也師叔楚之崇也師叔入盟子良在楚楚鄭親矣
來勸我戰我克則來不克遂往以我卜也鄭不可從
趙括趙同曰率師以來惟敵是求克敵得屬又何俟
必從彘子知季曰原屏咎之徒也趙莊子曰樂伯善
哉實其言必長晉國楚少宰如晉師曰寡君少遭閔
凶不能文聞二先君之出入此行也將鄭是訓定豈
敢求罪於晉二三子無淹久隨季對曰昔平王命我
先君文侯曰與鄭夾輔周室母廢王命今鄭不率寡
君使羣臣問諸鄭豈敢辱侯人敢拜君命之辱彘子
以為諂使趙括從而更之曰行人失辭寡君使羣臣
遷大國之迹於鄭曰無辟敵羣臣無所逃命楚子又

使求成於晉晉人許之盟有日矣楚許伯御樂伯攝
叔為右以致晉師許伯曰吾聞致師者御靡旌摩壘
而還樂伯曰吾聞致師者左射以蔽代御執轡御下
兩馬掉鞅而還攝叔曰吾聞致師者右入壘折馘執
俘而還皆行其所聞而復晉人逐之左右角之樂伯
左射馬而右射人角不能進矢一而已麋興於前射
麋麗龜晉鮑癸當其後使攝叔奉麋獻焉曰以歲之
非時獻禽之未至敢膳諸從者鮑癸止之曰其左善
射其右有辭君子也既免晉魏錡求公族未得而怒
欲敗晉師請致師弗許請使許之遂往請戰而還楚
潘黨逐之及榮澤見六麋射一麋以顧獻曰子有軍
事獸人無乃不給於鮮敢獻於從者叔黨命去之趙
旃求卿未得且怒於失楚之致師者請挑戰弗許請
召盟許之與魏錡皆命而往卻獻子曰二憾往矣弗
備必敗彘子曰鄭人勸戰弗敢從也楚人求成弗能
好也師無成命多備何為士季曰備之善若二子怒

楚楚人乘我喪師無日矣不如備之楚之無惡除備而盟何損於好若以惡來有備不敗且雖諸侯相見軍衛不徹警也彘子不可士季使鞏朔韓穿帥七覆於敖前故上軍不敗趙嬰齊使其徒先具舟於河故敗而先濟潘黨既逐魏錡趙旃夜至於楚軍席於軍門之外使其徒入之楚子為乘廣三十乘分為左右右廣鷄鳴而駕日中而說左則受之日入而說許偃御右廣養由基為右彭名御左廣屈蕩為右乙卯王乘左廣以逐趙旃趙旃棄車而走林屈蕩搏之得其甲裳晉人懼二子之怒楚師也使軫車逆之潘黨望其塵使騁而告曰晉師至矣楚人亦懼王之入晉軍也遂出陳孫叔曰進之寧我薄人無人薄我詩云元戎十乘以先啓行先人也軍志曰先人有奪人之心薄之也遂疾進師車馳卒奔乘晉軍桓子不知所為鼓於軍中曰先濟者有賞中軍下軍爭舟舟中之指可掬也晉師右移上軍未動工尹齊將右拒卒以逐

下軍楚子使唐狡與蔡鳩居告唐惠侯曰不穀不德而貪以遇大敵不穀之罪也然楚不克君之羞也敢藉君靈以濟楚師使潘黨率游闕四十乘從唐侯以爲左拒以從上軍駒伯曰待諸乎隨季曰楚師方壯若萃於我吾師必盡不如收而去之分謫生民不亦可乎殿其卒而退不敗王見右廣將從之乘屈蕩尸之曰君以此始亦必以終自是楚之乘廣先左晉人或以廣隊不能進楚人碁之脫扁少進馬還又碁之拔旆投衛乃出顧曰吾不如大國之數奔也趙旃以其良馬二濟其兄與叔父以他馬反遇敵不能去棄車而走林逢大夫與其二子乘謂其二子無顧顧曰趙旃在後怒之使下指木曰尸汝於是授趙旃綏以免明日以表尸之皆重獲在木下楚熊負羈囚知罃知莊子以其族反之厨武子御下軍之士多從之每射抽矢蔽納諸厨子之房厨子怒曰非子之求而蒲之愛董澤之蒲可勝旣乎知季曰不以人子吾子其

可得乎吾不可以苟射故也射連尹襄老獲之遂載其尸射公子穀臣囚之以二者還及昏楚師軍於郢郢遂次於衡雍潘黨曰君盍築武軍而收晉尸以為京觀臣聞克敵必示子孫以無忘武功楚子曰非爾所知也夫文止戈為武武王克商作頌曰載戢干戈載櫜弓矢我求懿德肆于時夏允王保之又作武其卒章曰耆定爾功其三曰鋪時緯思我徂惟求定其六曰綏萬邦屢豐年夫武禁暴戢兵保大定功安民和衆豐財者也故使子孫無忘其章今我使二國暴骨暴矣觀兵以威諸侯兵不戢矣暴而不戢安能保大猶有晉在焉得定功所違民欲猶多民何安焉無德而彊爭諸侯何以和衆利人之幾而安人之亂以為己榮何以豐財武有七德我無一焉何以示子孫其為先君宮告成事而已武非吾功也古者明王伐不敬取其鯨鯢而封之以為大戮於是乎有京觀以

懲淫慝今罪無所而民皆盡忠以死君命又何以爲
京觀乎祀於河作先君宮告成事而還是役也鄭石
制實入楚師將以分鄭而立公子魚臣辛未鄭殺僕
叔及子服君子曰史佚所謂母怙亂者謂是類也詩
曰亂離瘼矣爰其適
歸歸於怙亂者也夫

管杜注滎陽縣東北有管城隋置縣明初省今故
城在開封府鄭州北二里 敖郃杜注二山在滎
陽縣西北滎陽令開封府滎澤縣縣西北有敖山
董澤杜注澤名河東聞喜縣東北有董池陂今

屬山西
平陽府

公羊

莊王伐鄭勝乎皇門放乎路衢鄭伯肉袒左執
茅旌右執鸞刀以逆莊王曰寡人無良邊垂之

臣以干天禍是以使君王沛焉辱到敝邑君如矜此
喪人錫之不毛之地使帥一二耆老而綏焉請唯君

王之命莊王曰君之不令臣交易為言是以使寡人得見君之玉面而微至乎此莊王親自手旌左右攜軍退舍七里將軍子重諫曰南郢之與鄭相去數千里諸大夫死者數人廝役虐養死者數百人今君勝鄭而不有無乃夫民臣之力乎莊王曰古者村不穿皮不蠹則不出於四方是以君子篤於禮而薄於利要其人而不要其土告從不赦不詳吾以不詳道民災及吾身何日之有旣則晉師之救鄭者至曰請戰莊王許諾將軍子重諫曰晉大國也王師淹病矣君請勿許也莊王曰弱者吾威之彊者吾辟之是以使寡人無以立乎天下令之還師而逆晉寇莊王鼓之晉師大敗晉衆之走者舟中之指可掬矣莊王曰嘻吾兩君不相好百姓何罪令之還師而佚晉寇

穀梁

績功也
功事也

胡傳

戰而言及主乎是戰者也案左氏晉師救鄭經既不以救鄭書矣又不言楚晉戰於邲而使晉

主之何也陳人弑君晉不討賊而楚能討之楚人圍鄭亦既退師與鄭平矣而又與之戰則非觀釁之師也故釋楚不貶而使晉主之獨與常辭異乎案邲之役六卿並在大夫司馬皆具官不欲勦民者三帥也違命濟師者先穀也而獨罪林父何也尊無二上定於一也古者仗鉞臨戎專制閫外雖君令有所不受況其屬乎欒書救鄭軍帥之欲戰者八人武子遂還衆不敢過偃陽之舉勾偃二將皆請班師荀彘令曰七日不克必爾乎取之遂下偃陽林父既知無及於鄭焉用之矣諸帥又皆信然其策先穀若獨以中軍佐濟者下令三軍無得妄動按軍法而行辟夫豈不可既不能令乃畏失屬亡師之罪而從韓獻子分惡之言知難而冒進是棄晉師於誰責乎故後誅先穀不去其官此稱敗績特以林父主之也

集說 楊氏士勛曰公羊傳稱荀林父稱名氏先楚子

者惡林父也若然城濮之戰後子玉當是善子

玉乎徐邈云先林父者內晉而外楚是也 劉氏敵

曰戰而言及之者主之者也猶曰晉荀林父為志乎

為此戰也云爾又曰公羊曰大夫不敵君此其稱名

氏以敵君何不與晉而與楚子為禮也非也大夫不

敵君而荀林父獨得稱名氏以敵楚子此可謂與晉

而不與楚子為禮而非不與晉而與楚子為禮也城

濮之戰子玉得臣不見名氏公羊以謂大夫不敵君

也彼子玉以不見名氏為不敵君二者孰能知之乎

朱子曰左傳分謫事近世士大夫多是如此只要

徇人情如荀林父邲之役先穀違命而濟乃謂與其

專罪六人同之是何等見識當時為林父者只合按

兵不動召先穀而誅之 胡氏寧曰邲之戰先穀趙

旃實敗晉師而獨書林父者責元帥也武侯祁山之

戰違命於街亭者馬謖也失於箕谷者鄧芝也而武

侯深自刻責以為咎皆在已此亦春秋一統之義也
任歸於一者責有所歸權分於下者衆無適從吳楚
既反漢用條侯以梁王之貴太后之尊交請救援條
侯謹守便宜竟破七國唐六道重兵攻圍淮蔡久而
無功及裴度視師雖韓弘亦與疾督戰遂擒元濟代
宗以九節度之師圍慶緒不立元帥一夕而潰其成
敗之績豈不著明也哉張氏洽曰林父此行本為
救鄭而鄭已服楚士穀之徒恃彊專制林父雖知楚
之不可敵而不能止諸帥之從楚師春秋所以不書
救鄭而特以林父主此戰著其敗師之罪也呂氏
大圭曰自楚執討賊之權於是陳為楚有鄭不堪楚
之屢伐而受盟辰陵然曰與其來者可也則猶未純
乎從楚也故徵事於晉晉既不能有陳而僅爭鄭則
邲之一戰晉楚勝負之一決也自邲之敗而楚橫行
莫制矣趙氏鵬飛曰林父之師將以救鄭而春秋
書及楚子戰而不書救非救鄭也鄭自春被圍蓋亦

久矣今六月而後救何益於救哉邲雖鄭地而鄭圍已解楚既得鄭縱敗楚於邲能反鄭之叛轍乎況反為楚所敗徒弊師旅益楚之勢而固鄭之叛果何益哉方鄭之被圍晉不能帥師直赴鄭難俟其既折而降楚乃區區勞重兵以犯其破竹之鋒是自取敗也夫兵民命也戰危事也安可用民於死地以僥倖萬一之勝哉則晉景之為人尤在襄成之下而林父之舉曾盾穿之不若也霸業不競宜矣晉本救鄭而聖人不書救無其實不可假其名也凡師被伐者為主楚伐鄭而以晉主之內晉於鄭也晉雖妄舉無功而聖人以此內辭書之所以抑彊楚而存大義也若曰貶晉與楚則非經意也黃氏震曰陳與鄭皆服楚盟于辰陵矣楚討徵舒之罪因欲滅人之國楚自叛盟而行無道如此陳鄭一體鄭尤新盟如之何不背楚而歸晉是楚之伐鄭者非也鄭伯肉袒以逆楚既舍之晉欲退師獨以先穀連衆取敗晉師雖敗救鄭之

義豈與之俱敗是晉之敗於楚不足為辱也世多以
成敗論人故譽楚而貶晉耳家氏鉉翁曰論者謂
邲之敗與楚以霸不然也晉救鄭不書緩也責晉非
與楚也林父逗撓不前春秋正失律之誅責林父非
與楚也豈以晉一敗之故而僭王之楚可使之霸乎
李氏廉曰春秋凡與楚戰不以勝敗皆以與戰之
國為主徐邈曰內晉而外楚是也公羊以為荀林父
稱名氏先楚子者惡林父非也此因得臣書人而穿
鑿耳陳氏亦謂大夫敵君於是始蓋主公羊說未可
從也汪氏克寬曰不書救者以其緩不及事無救
患之實耳或謂不書救鄭是予楚以伯然晉文晉悼
之伯書楚人救衛救鄭豈不予晉以伯乎又曰林父
身為元帥始既不能禁副屬之違令而專行終又不
能躬帥士卒冒矢石而力戰乃鼓於軍中倡為棄甲
曳兵之敗則喪師之罪不責林父而諉於誰乎然楚
君大夫與列國戰皆貶書人故楚成於泓得臣於城

濮囊瓦於柏舉竝書人惟此書晉荀林父帥師以敵
楚子者尊晉而抑楚也黃氏正憲曰案楚莊彊暴
蔑視諸國入陳圍鄭莫敢誰何其威勢猖獗十倍楚
成矣且齊桓召陵之師尚約六國為援晉文城濮之
戰亦以三大國為助今景公初立伯業已衰眎文公
時威力人心消索幾盡乃欲林父以偏師當虎狼之
楚乎藉令諸將同心三軍用命勝負之勢猶未可知
況林父節制不嚴計謀不一始惑於韓厥分惡專罪
之言既壞於錡旃致師召盟之請故楚師一乘倉卒
無措然則致此敗者豈可專歸咎於先穀哉自邲一
敗而楚滅蕭圍
宋勢益橫行矣

秋七月

附錄左傳

鄭伯許男如楚秋晉師歸桓子請死晉
侯欲許之士貞子諫曰不可城濮之役晉

師三日穀文公猶有憂色左右曰有喜而憂如有憂而喜乎公曰得臣猶在憂未歇也困獸猶鬪況國相乎及楚殺子玉公喜而後可知也曰莫余毒也已是大晉再克而楚再敗也楚是以再世不競今天或者大警晉也而又殺林父以重楚勝其無乃久不競乎林父之事君也進思盡忠退思補過社稷之衛也若之何殺之夫其敗也如日月之食焉何損於明晉侯使復其位

冬十有二月戊寅楚子滅蕭

左傳冬楚子伐蕭宋華椒以蔡人救蕭蕭人因熊相宜僚及公子丙王曰勿殺吾退蕭人殺之王怒遂圍蕭蕭潰申公巫臣曰師人多寒王巡三軍拊而勉之三軍之士皆如挾纊遂傳於蕭還無社與司馬卯言號申叔展叔展曰有麥麴乎曰無有山鞠窮乎曰無河魚腹疾奈何曰目於督井而拯之若為茅經

哭井則已明日蕭潰申叔視其井則茅經存焉號而出之

胡傳

假於討賊而滅陳春秋以討賊之義重也末滅而書入惡其貳已而入鄭春秋以退師之情恕

也末滅而書圍與人為善之德宏矣至是肆其彊暴滅無罪之國其志已盈雖欲赦之不得也故傳稱蕭

潰經以滅書斷其罪也孟子曰以力假仁者伯伯必有大國楚莊蓋以力假仁不能久假而遽歸者也建

萬國親諸侯者先王之政興滅國繼絕世者仲尼之法今乃滅人社稷而絕其祀亦不仁甚矣蕭既滅亡

必無赴者何以得書於魯史楚莊縣陳入鄭大敗晉師于郟莫與校者不知以禮制心至於驕溢克伐怨

欲皆得行焉遂以滅蕭告赴諸侯矜其威力耳孟子定其功罪以五伯為三王之罪人春秋史外傳心之

要典推此類求之斯得矣

集說

高氏開曰楚既得陳鄭又敗晉師遂深入內地
憑陵小弱滅人之國書以著其暴也趙氏鵬

飛曰蕭宋之附庸也在宋之南自宋至楚蓋千里而
楚兵直至於宋郊滅其附庸則楚之患深矣晉不能
興文襄之業坐視其滅而無寸兵之援蓋前乎此救
鄭而敗尚何敢稱兵向楚哉楚莊得陳而不有得鄭
而復其君論者以為賢觀今滅蕭之舉則前日之服
陳鄭果真情乎莊固知陳鄭之祀未易絕也黃氏
震曰楚莊入陳伐鄭敗晉滅蕭憑陵諸國甚矣左氏
於滅蕭高歸曲於蕭之殺二囚而歸美乎楚之附三
軍大抵左史楚人而左傳多楚人之言也家氏鉉
翁曰蕭宋之附庸也楚莊窮兵以威上國自是宋始
多事易子析骸之禍權輿於此汪氏克寬
曰楚莊滅蕭所以逼宋而脅諸侯之服已也

晉人宋人衛人曹人同盟于清丘

此大夫同盟之始
清丘杜注衛地在濮

陽縣東南唐置清丘驛在今直隸大名府開州東南七十里長樂里

左傳

晉原穀宋華椒衛孔達曹人同盟于清丘曰恤病討貳

胡傳

書同盟志同欲也或以惡其反覆而書同盟非也春秋不責盟誓自隱公始年書儀父盟蔑家

人盟宿已不實言矣奚待清丘然後惡反覆乎清丘載書恤病討貳口血未乾敗其盟好所謂不待貶而

惡見者也又奚必人諸國之卿然後知反覆之可罪乎楚既入陳圍鄭大敗晉師伐蕭滅之憑陵諸國甚

矣為諸侯計者宜信任仁賢修明政事自彊於為善則可以保其國耳曾不是圖而刑牲歃血要質鬼神

斯以禦楚謀之不臧孰大於是故國卿貶而稱人譏失職也原穀違命喪師乃晉國罪人而主茲盟約所

信任者皆可知矣

集說

楊氏士勛曰新城書同傳云同外楚則清丘亦是外楚省文也劉氏敞曰左氏曰卿不書不

實其言也

予謂春秋之世不實其言者衆矣奚獨此耶程子曰晉為楚敗諸侯懼而同盟既而皆渝故

書人以貶之

趙氏鵬飛曰同盟非大夫之事也諸侯同盟不盟於方岳之下猶以為僭而況大夫乎莊

十六年

幽之盟是也其後趙盾欲求諸侯復為新城之盟聖人排盾於諸侯之下以為同盟非大夫所宜

主也

今晉景將求諸侯而以大夫用同盟之禮蓋循趙盾之轍而不知晉所以不能得諸侯者盾之故也

晉以大夫

主之而諸侯亦以大夫受盟大夫果足以結信乎故杜壇未掃而宋師伐陳衛人救陳宋衛交

兵互相

矛盾則今日之盟何足恃也故聖人舉皆人之不出大夫之名非微者也貶也家氏鉉翁曰幽

之同盟

內外小大翕然來同齊伯之方盛也新城之同盟諸侯散者復合晉伯之漸衰也清丘之同盟異

者衆而同者鮮晉不復可言伯矣程氏端學曰大夫同盟自此始且盟不旋踵宋伐陳而衛救之楚伐宋而三國不恤則盟無益也李氏廉曰晉景公之同盟五清丘斷道蟲牢馬陵于蒲汪氏克寬曰新城之同晉以趙盾主盟清丘之同復以四國之大夫盟齊盟所以一天下之心而晉以大夫尸之又其甚而諸侯之大夫與焉伯業之不振宜矣季氏本曰楚子滅蕭以脅宋宋與曹衛皆唇齒之國猶欲推晉伯以為主而晉方畏懾不能自彊何足以制楚哉卓氏爾康曰楚服陳鄭敗晉師于邲滅蕭以威宋其志不小於是為清丘之盟雖有懼難聯交之心而勢實不競謀之無成故稱人以畧之

宋師伐陳衛人救陳

左傳

宋為盟故伐陳衛人救之孔達曰先君有約言焉若大國討我則死之

集說黃氏仲炎曰陳附楚者也宋以清丘之盟而伐
之衛背盟而救之伐者義而救者不義矣趙
氏鵬飛曰楚方鵠張雄視列國諸侯所宜戮力一心
比小事大以抗其鋒今晉為清丘之盟陳人不與宋
師伐陳問陳故也而衛叛晉附陳以鬪宋兵卒之陳
卒不至而宋受楚圍皆衛之故聖人於宋書師予其
問罪之舉於衛書人責其交亂之罪也家氏鉉翁
曰胡氏謂宋師非義陳為可恤愚以為未然楚用詐
入陳幾亡人國春秋不與也宋伐楚之與國為人
難謂之非義不可衛甫受清丘之盟乃救陳以媚楚
謂其救之為義亦不可也張氏溥曰盟而驟忘未
有若清丘者盟之言曰恤病討貳陳貳於楚而宋伐
之衛救陳不討貳也楚伐宋而晉衛不救不恤病也
以春秋之法言之背盟之罪陳其首也衛其次也衛
殺孔達天下傷之孔達但知先君有約言而不知同
盟之不可以貳則其死也匹夫耳晉為盟主而不能

容一守死之匹夫則晉也秦隘春秋前書晉人宋人
衛人曹人同盟于清丘後書衛殺其大夫孔達是盟
也竟以殺一大夫終
乎則盟無善盟矣

乙丑定王十一年十有三年晉景四年齊頃三年衛穆四年蔡

年陳成三年杞桓四十年宋文
十五年秦桓九年楚莊十八年

春齊師伐莒

公作
伐衛

左傳

十三年春齊師伐莒莒
恃晉而不事齊故也

集說

趙氏鵬飛曰十一年公孫歸父會齊人伐莒以
不肯平之憾也今間歲而齊又伐之莒何負於

齊哉徒以齊魯同平莒鄭莒不肯而魯有向之獲而
齊未有所獲也莒豈負齊魯之邑哉魯不義伐莒而

莒夫東鄙之邑齊復以不義伐莒莒安得西鄙之邑而給諸書曰師非褒也用大師以扼小邦也齊頃之惡於是甚於惠公矣吳氏澂曰齊以彊凌弱而伐莒十一年之伐稱齊人此稱齊師者甚其動大衆而伐小國也汪氏克寬曰公羊作伐衛證之經文前後皆無齊衛文怨之事而於莒則四年平之不肯而魯伐之十一年齊又伐之則此為伐莒無疑矣

夏楚子伐宋

左傳

夏楚子伐宋以其救蕭也君子曰清丘之盟惟宋可以免焉

胡傳

楚人滅蕭將以脅宋諸侯懼而同盟為宋人計者恤民固本輕徭薄賦使民效死親其上則可

以待敵矣計不出此而急於伐陳攻楚與國非策也

集說

孫氏復曰楚子伐宋以其伐陳也張氏洽曰天下無道小役大弱役疆宋不知屈伸消長之

道而欲

以區區之力疆侯國由此致伐趙氏鵬飛曰楚伐宋以宋師伐陳之故也陳叛晉國而從楚清

丘之盟

不與焉陳不與盟晉所當問而不能問宋伐之是宋犯楚之怒也為晉伐陳而犯楚怒則今日

宋被楚兵

晉所當救而不救諸侯何恃哉陳當伐而不伐宋當救而不救晉景於此尚欲嗣文襄之業吾

知其無能為矣

黃氏震曰陳叛晉國而從楚清丘之盟陳不至而宋伐之故楚子伐宋蓋為陳伐之也

王氏貫道

曰前此楚侵之今又伐之繼又圍之晉不一動心焉宋雖為晉而晉則莫宋庇也則終於為

平而已

李氏廉曰楚有事於列國皆自鄭及宋楚成之爭伯敗宋於泓楚穆之爭伯弱宋於厥貉楚莊

之興挾鄭人

以侵宋卒之今年之伐明年之圍又明年之平而南北之勢成矣成十八年彭城之役楚又

年之平而南北之勢成矣成十八年彭城之役楚又

扶鄭以圖宋向非悼公之盛則于宋之盟不待襄公之末年而天下分伯矣卓氏爾康曰陳鄭宋皆在河南天下要樞也鄭處其西宋處其東陳則介乎鄭宋之間得鄭則可以致西諸侯得宋則可以致東諸侯得陳則可以致鄭宋陳鄭既皆歸楚若復得宋則河南之地盡為楚有矣

案宋伐陳以召楚兵故胡傳譏其非策然必謂楚人書爵為有辭於伐則謬矣去年滅蕭明年圍宋兗暴已甚而俱書楚子亦得謂之有辭乎蓋是時盟會征伐諸侯皆不自行而政在大夫是以不競於楚聖人屢書楚子以見其親蒞行間也與辰陵之盟不同

秋螽

公作

集說何氏休曰先是新饑而使歸父會齊人伐莒賦敝不足國家遂虛下求不已杜氏預曰為災

故書

冬晉殺其大夫先穀

穀殺作穀音同

左傳

秋赤狄伐晉及清先穀召之也冬晉人討郟之敗與清之師歸罪於先穀而殺之盡滅其族君

子曰惡之來也已則取之其先穀之謂乎

清杜注一名清原今山西平陽府稷山縣西北二十里有清原城

胡傳

先穀違命大敗晉師元帥不能用鉞已失刑矣今又重有罪焉晉人治其罪而戮之義也曷為

稱國以殺而不去其官夫兵者安危所繫有國之大事也將非其人則敗雖得其人使親信間之則敗以剛復不仁者參焉而莫肯用命則敗凡此三敗君之過也河曲之戰趙穿獨出而史駢之謀不用濟涇而

次樂賢欲東而荀偃之令不行令林父初將中軍乃以先穀佐之使敵國謀臣知其從政者新未能行令誰之過歟故稱國以殺不去其官罪累上也

集說

蘇氏轍曰邲之役晉三帥皆不欲戰先穀不可故敗誅之固其宜也然先穀先軫之後先軫晉

之舊勲也晉人誅穀而盡滅其族稱國以殺言刑之過也高氏閌曰邲之役三帥皆欲還先穀固請戰

遂及於敗至是以為討然釋趙旃魏錡不討而獨誅先穀為政不平殺者不受治矣又族滅之惡之甚也

張氏洽曰越椒將攻王而楚莊尚思子文之治楚而復克黃之所先穀先軫之孫而滅其族蓋晉之德

刑皆不足以敵楚矣季氏本曰自戰邲至此已一年有半何為始討其罪乎意者先穀好剛任直多為

同列所排適當楚又伐宋則歸咎前敗以中先穀耳故不去其大夫以為非正刑也張氏溥曰晉殺先

穀討邲敗也穀佐中軍僨師當誅然邲敗師歸林父請死士貞子以楚殺得臣諫晉侯復其位舍將而殺佐穀不服也又加以召狄之罪族而後快豈先軫之勲獨不可使有後於晉乎晉文公敗楚於城濮其能刑也殺顛頡祁瞞舟之僑三罪而民服今邲戰踰年而族先穀穀之死不以軍政而以君大夫之喜怒春秋又何忍復去其官乎

附錄左傳

清丘之盟晉以衛之救陳也討焉使人弗去曰罪無所歸將加而師孔達曰苟利社稷

稷請以我說罪我之由我則為政而亢大國之討將以誰任我則死之

丙寅定王十

十有四年

晉景五年齊頃四年衛穆五年蔡文十七年鄭襄十年曹文二十三年

年陳成四年杞桓四十二年宋文十六年秦桓十年楚莊十九年

春衛殺其大夫孔達

左傳

十四年春孔達縊而死衛人以說於晉而免遂

大國既伏其罪矣敢告衛人以

為成勞復室其子使復其位

胡傳

孔達棄信以危社稷衛人按其罪而誅之可也

於見討誰之過歟稱國以殺不去其官

罪累上也春秋端本清源故書法如此

集說

胡氏寧曰孔達之死謀之不臧者也先君雖有

約言若其有罪而大國見討亦可踐言不自省

乎而況同盟口血未乾卽亢大國之討以危其社稷

乃以身死之求說於晉與自經於溝瀆而莫之知者

奚遠哉是時陳貳於楚為孔達計者若顧約言告之

以不當貳可也陳氏傅良曰孔達自殺而稱國以

殺其君意也。趙氏鵬飛曰：衛穆叛清丘之盟，背晉而與楚。今將貳楚而復歸於晉，無以為辭，則殺孔達以說之。曰：前日之謀，孔達之罪也。既除之，利則為己，功害則為臣。罪立其朝者，亦難矣。此與刺公子買之事無異。故以國殺為文。家氏鉉翁曰：據傳，孔達自以其身紓國患，然達為政而背清丘之盟，救陳諂楚，謂之無罪不可也。鄭氏玉曰：衛之於晉，始則背盟，救陳干大國之討，終則殺其臣，致辭取說，以求免稱。國以殺不去其官，罪累其上，宜哉。

夏五月壬申曹伯壽卒

晉侯伐鄭

左傳：夏，晉侯伐鄭，為郟故也。告於諸侯，蒐焉而還。中行桓子之謀也。曰：示之以整，使謀而來，鄭人懼。

使子張代子良於楚鄭伯如楚謀
晉故也鄭以子良為有禮故名之

集說

孫氏復曰鄭與楚故
于邲鄭遂即楚討之正也

高氏開曰晉救鄭而敗
然靈成以來文公之

澤浸微干戈日尋積而至於蜀之盟豈特失鄭而已
乎趙氏鵬飛曰十二年楚子圍鄭晉救不及鄭卒

歸楚清丘之盟鄭不在也故晉侯伐鄭然清丘之盟
晉景不能親之而以大夫用同盟之禮聖人惡之沒

大夫之盟一貶稱人今景公能一出而躬擐甲胄天
下之幸也尚何貶哉故舉而爵之聖人樂人之勇於

為善而幸列國之有霸主也如此而諸儒更以為貶
何邪豈楚不可犯而鄭不當伐耶任鄭叛而縱楚彊

反為春秋所予邪雖伐鄭未必得鄭而興復之志有
足多者是以予之趙氏孟何曰晉君將嘗不書矣

楚入陳得陳圍鄭得鄭且將圍宋也而晉師不出楚
之得志於諸侯未有甚於此時者也景公為邲故伐

鄭告於諸侯蒐焉而還則其得書何天下不可以終
無伯也景公有志文襄之業自伐齊而後一合諸侯
伐鄭四同盟皆其君親之於是齊魯從而鄭服楚亦
無能為是故晉侯伐鄭始書之子之以復伯也家
氏鉉翁曰邲之役楚莊身履戎行晉景畏懦不出此
自將伐鄭雖無能為猶書晉侯嘉其稍能自彊耳
王氏元杰曰鄭惟彊弱是視初非惟義之從晉與救
鄭之師是以致邲之敗晉景雖無可附之德亦當念
之弗忘迨其喪師翻然從楚是何謀之
淺也春秋與晉伐鄭則鄭之罪明矣
案鄭以晉敗於邲遂叛晉即楚宜晉景自將以伐之
也故書晉侯胡傳以為報怨之兵直書而義自見者
也非

秋九月楚子圍宋

左傳

楚子使申舟聘於齊曰無假道於宋亦使公子馮聘於晉不假道於鄭申舟以孟諸之役惡宋

曰鄭昭宋聲晉使不害我則必死王曰殺女我伐之見犀而行及宋宋人止之華元曰過我而不假道鄙我也鄙我亡也殺其使者必伐我伐我亦亡也亡一也乃殺之楚子聞之投袂而起屨及於室皇劍及於寢門之外車及於蒲胥之市秋九月楚子圍宋

集說

趙氏鵬飛曰伐宋而宋不屈繼之以圍其必宋之服也審矣楚將橫行列國許蔡已從陳鄭已

服則次及於宋宋列國之門戶也得宋則齊魯以此楚所以必於服宋也歷三時而圍不解卒得宋平而後已毒哉楚之為謀也晉固畏楚不敢救宋矣而宋其能獨抗楚乎則及楚人平非得已也吳氏澂曰宋前以救蕭而見伐今又以殺楚使而受圍楚之薦食上國宋之挑釁彊鄰俱可罪也李氏庶曰楚

至是再圍宋矣僖二十七年書楚人嫌辭也此書楚子直辭也汪氏克寬曰楚莊始而滅蕭以逼宋繼

而伐宋以聲其救蕭之罪又遣使過宋不假道以激怒於宋而使殺之於是國君親將環其國而攻之然

則楚子之志在於陵暴列國以取威爭伯其惡甚矣王氏樵曰鄭在楚之穀中未易旦夕爭也是時急

莫先於救宋宋救捷則鄭亦可招矣而晉不知所先後勞師於鄭而緩於救宋乃比之雖鞭之長不及馬

腹不知宋既去則楚威震及齊魯而南北之勢成矣豈但失鄭而已甚矣晉人之顛冥也陳氏際泰曰

伐宋甚也圍已甚也伐有名也圍無名也直書其事而輕重自明必起鄭而苛宋責晉而寬楚豈春秋之

哉

案去年伐宋今年圍宋必待其平而後已焉春秋屢書於冊罪楚之暴而責晉之不能救也胡傳於衛人

救陳以為著宋之罪而伐宋圍宋皆以
為宋所自取而責宋為深似非經旨

葬曹文公

冬公孫歸父會齊侯于穀

左傳

冬公孫歸父會齊侯于穀見晏桓子與之言魯
樂桓子告高宣子曰子家其亡乎懷於魯矣懷

必貪貪必謀人謀人人亦
謀已一國謀之何以不亡

晏濟南府齊河縣西北二十里
有晏城寰宇記謂之晏嬰城

胡傳

夫禮別嫌明微致治於未亂自天子出者也列
國之君非王事而自相會聚是禮自諸侯出矣

以國君而降班失列下與外臣會以外臣而抗尊出
位上與諸侯會是禮自大夫出矣君若贅旒陪臣執

命豈一朝一夕之故其所由來漸矣故易於坤之初六曰馴致其道至堅冰也易言其理春秋見諸行事若合符節可謂深切著明矣

集說 王氏葆曰遂以不正而立宣公公以不正而任其子歸父此年會齊侯明年會楚子見公與之深也諸侯失政自宣公始大夫專政自歸父始張氏洽曰魯素事齊而宣公之立公子遂主之故其父子常親於齊而齊亦不復計等列之不班從而與之會也非禮甚矣趙氏鵬飛曰歸父子事齊倚齊以專魯其為謀深矣而齊亦樂其諂事於已屈君之尊而下同之不以為抗頃公之立歸父兩如齊以奉其權故十一年同之伐莒今又同穀之會甘其諂而忍其抗悅其利而忘其專也於時楚疾於宋危矣宋人楚則齊魯以楚為鄙穀之會謀楚也故明年歸父會楚子于宋魯會之而齊不會非不畏楚也魯安則

齊安矣此歸父會齊侯之故也家氏鉉翁曰歸父之父外交彊齊弑君專國而孽于世濟其姦會齊侯會楚子比事而書著履霜之戒也汪氏克寬曰大夫會諸侯始於單伯會齊宋衛鄭之君子鄭而後公孫敖會晉侯于戚至叔仲彭生會晉卻缺于承筐則大夫自為會矣大夫盟諸侯始于柔會宋公陳侯蔡叔盟于折而後公孫敖會宋公陳侯鄭伯晉士穀盟于垂隴至公子遂會晉趙盾盟于衡雍則大夫自相盟矣然莊僖以下大夫未專政也文宣以下大夫始專政矣卓氏爾康曰魯西南與宋為界楚人圍宋則魯有剝牀以膚之慮矣是時行父當國欲使歸父會楚謀其不免但魯素服於齊恐未得楚庇先受齊患故預遣歸父會齊侯于穀一以觀齊圖楚之志一以盡已事齊之禮嚴氏啓隆曰楚子使申舟聘於齊則齊楚之有交久矣歸父會齊蓋謀所以事楚也

附錄左傳

孟獻子言於公曰臣聞小國之免於大國也聘而獻物於是有庭實旅百朝而獻功

於是有人容貌采章嘉淑而有加貨謀其不免也誅而薦賄則無及也今楚在宋君其圖之公說

丁定王十三年

十有五年

晉景六年齊頃五年衛穆六年蔡文十八年鄭襄十一年曹宣公廬

元年陳成五年杞桓四十年宋文十七年秦桓十一年楚莊二十年

春公孫歸父會楚子于宋

左傳

十五年春公孫歸父會楚子于宋

胡傳

楚子不假道於宋以啓釁端而圍之陵蔑諸侯甚矣諸侯縱不能存先代之後嚴兵固圍以為

聲援猶之可也乃以周公之裔千乘之國謀其不免至於薦賄不亦鄙乎若此類聖人不徒筆之於經也

比事以觀則知春秋經世之畧矣

集說

杜氏預曰從前年孟獻子之言也陳氏傅良曰許氏翰曰楚圍宋之威振及魯矣

始特會楚也黃氏仲炎曰自晉伯不競而楚爭諸侯於是伐陳而陳服討鄭而鄭降圍宋而宋請平往駢首南向者不止此矣然陳亂無君而楚來討賊國人皇皇惟命是聽固不足責至如鄭宋被圍初皆闔城拒守綿歷時月力不能支然後請服此亦有不得已者獨魯不然方楚子在宋兵未及魯而望風納賄惟恐或後是以有穀之會焉此可見魯君大夫苟免自營怖於威武之甚矣趙氏鵬飛曰歸父會楚子于宋謀自安之計耳而說者徒見繼書宋及楚平之事遂以為歸父平二國之憾蓋附會而不稽其實也歸父春會楚子而夏五月宋楚始平豈緩頰數月而後能平之非人情也魯之所以會楚者自謀而已

宋與魯為鄰宋去則楚兵至魯矣魯見宋之危而諸侯畏楚無敢救也故懼而求服焉所以逆楚子之意而弭其兵也自謀猶恐不濟況能為宋計乎謂魯平楚宋者妄說也家氏鉉翁曰楚伐宋於魯無所預而魯人震悸正由宣公篡弒十有五年未有討之者今見楚戮夏徵舒懼而往會李氏廉曰歸父會楚子于宋正與昭九年叔弓會楚子于陳書法事情皆同左氏胡氏傳得之矣王氏樵曰以千乘之魯為之以道猶可自彊齊晉諸與國猶可責以信義互為聲援也謀其不免至於薦賄何其卑乎昔楚執宋公以伐宋以獻捷威魯而魯懼先諸侯而趨之今楚子圍宋威未至魯而魯震先宋之未平而求媚焉何其益卑乎孟獻子號賢大夫而謀國若此亦可鄙也已

夏五月宋人及楚人平

左傳

宋人使樂嬰齊告急於晉晉侯欲救之伯宗曰不可古人有言曰雖鞭之長不及馬腹天方授

楚未可與爭雖晉之彊能違天乎諺曰高下在心川澤納汙山藪藏疾瑾瑜匿瑕國君含垢天之道也君其待之乃止使解揚如宋使無降楚曰晉師悉起將至矣鄭人囚而獻諸楚楚子厚賂之使反其言不許三而許之登諸樓車使呼宋人而告之遂致其君命楚子將殺之使與之言曰爾既許不穀而反之何故非我無信女則棄之速即爾刑對曰臣聞之君能制命為義臣能承命為信信載義而行之為利謀不失利以衛社稷民之主也義無二信信無二命君之賂臣不知命也受命以出有死無貲又可賂乎臣之許君以成命也死而成命臣之祿也寡君有信臣下臣獲考死又何求楚子舍之以歸夏五月楚師將去宋申犀稽首於王之馬前曰無畏知死而不敗廢王命王棄言焉王不能荅申叔時僕曰築室反耕者宋必

聽命從之宋人懼使華元夜入楚師登子反之牀起之曰寡君使元以病告曰敝邑易子而食析骸以爨雖然城下之盟有以國斃不能從也去我三十里惟命是聽子反懼與之盟而告王退三十里宋及楚平華元為質盟曰我無爾詐爾無我虞

公羊

莊王圍宋軍有七日之糧爾盡此不勝將去而歸爾於是使司馬子反乘堙而闚宋城宋華元

亦乘堙而出見之司馬子反曰子之國何如華元曰憊矣曰何如曰易子而食之析骸而炊之司馬子反曰嘻甚矣憊雖然吾聞之也圍者柑馬而秣之使肥者應客是何子之情也華元曰吾聞之君子見人之厄則矜之小人見人之厄則幸之吾見子之君子也是以告情於子也司馬子反曰諾勉之矣吾軍亦有七日之糧爾盡此不勝將去而歸爾揖而去之反於莊王莊王曰何如司馬子反曰憊矣曰何如曰易子

而食之折骸而炊之莊王曰嘻甚矣憊雖然吾今取此然後而歸爾司馬子反曰不可臣已告之矣軍有七日之糧爾莊王怒曰吾使子往視之子曷為告之司馬子反曰以區區之宋猶有不欺人之臣可以楚而無乎是以告之也莊王曰諾舍而止雖然吾猶取此然後歸爾司馬子反曰然則君請處於此臣請歸爾莊王曰子去我而歸吾孰與處於此吾亦從子而歸爾引師而去之此皆大夫也其稱人何貶曷為貶平者在下也

胡傳此華元子反二國之卿其稱人何貶也春秋賤欺詐惡侵伐二卿不愛其情釋怨解紛使宋無亡國之憂楚無滅國之罪功亦大矣宜在所褒何以貶也善則稱君過則稱己則民作忠今二卿自以情實私相告語取必於上以成平國之功而其君不預知焉非人臣之義也世衰道微暴行交作君有聽於

臣父有聽於子仲尼所為懼春秋所以作也故平以
鮮紛雖其所欲而平者在下則大倫紊矣聖人明其
道不計其功故褒貶如此然則臣而有安國家利社
稷者專之不可乎曰專之而可者謂境外也子反在
君之側無奏報之難幾會之失奚急於平而專之若
是哉或曰子反攘善則知其罪矣華元救國急難而
紓其情實何尤焉夫宋先代之後武王所封以備三
恪橫見侵偏非有可滅之罪也若以大義責之曰子
為上卿不能恤小助桀為虐陵我郊保圍我城郭欲
滅我社稷縱子得之何面目見天下之士乎使子反
果忠楚莊果賢必為義動退師止衆結盟而反矣何
必輕見情實蹈不測之險乎後世羊陸效其所為交
歡邊境而議者以為非
純臣也知春秋之法矣

集說 董氏仲舒曰子反與華元平是專內政而外擅
名也 啖氏助曰和不盟曰平 劉氏敬曰

公羊曰大其平乎已也非也臣無專美古今之通誼也且莊王非不賢者子反不退與其君謀而遂擅與宋平可謂義乎又曰穀梁曰平稱衆上下欲之也非也暨齊平何以不曰暨齊人平乎又曰外平不道以吾人之存焉道之也非也楚人圓宋經歷三時幸而得平以告諸侯故魯史有其事耳且外盟會常書外平何以不可書陳氏傳良曰凡平不書必關於天下之故也而後書有與楚平者矣文九年陳平不書宣十年鄭平不書至宋始書之僖二十四年宋嘗及楚平矣至莊王始書之必宋從楚必莊王得宋天下將有南北之勢春秋特致意焉呂氏大圭曰晉與楚爭陳楚討少西氏之亂而陳在楚宇下矣晉與楚爭鄭邲之戰敗而鄭又在楚宇下矣宋伐陳而衛救之則衛又貳於楚歸父會于宋而魯又卽於楚楚之圍宋軍罷食盡而將去矣宋人告急晉不能出師以援之宋及楚平豈得已哉書曰宋人及楚人平以見

列國之無伯也以見荆楚之恣橫也以見諸侯之有畏於楚而莫有能救之者也劉氏克莊曰春秋之法卿不憂諸侯政不在大夫子反為楚臣而恤宋民是憂諸侯也不復其君而與敵平是在大夫也程氏端學曰宋先代之後國雖小天下之望也諸侯之門戶也楚頓兵三時財耗民罷使晉救之宋攻其內晉擊其外一舉而伯業定矣師不敢出則晉之不振而有蜀之盟也惜哉

六月癸卯晉師滅赤狄潞氏以潞子嬰兒歸

潞氏杜注赤狄之別

種今山西潞安府潞城縣即其地也縣東北四十里有古潞城

左傳

潞子嬰兒之夫人晉景公之姊也酆舒為政而殺之又傷潞子之目晉侯將伐之諸大夫皆曰

不可酆舒有三雋才不如待後之人伯宗曰必伐之狄有五罪雋才雖多何補焉不祀一也耆酒二也棄

仲章而奪黎氏地三也虐我伯姬四也傷其君目五也怙其雋才而不以茂德茲益罪也後之人或者將敬奉德義以事神人而申固其命若之何待之不討有罪曰將待後後有辭而討焉母乃不可乎夫恃才與衆亡之道也商紂由之故滅天反時為災地反物為妖民反德為亂亂則妖災生故文反正為之盡在狄矣晉侯從之六月癸卯晉荀林父敗赤狄於曲梁辛亥滅潞鄭舒奔衛衛人歸諸晉晉人殺之

黎氏杜注黎侯國上黨壺關縣有黎城今潞安府長治縣西三十里黎侯亭是也又山東東昌府范縣有黎侯城則黎侯失國寓衛時所居之地曲梁杜注廣平曲梁縣也今曲梁故城在直隸廣平府永年縣東北

胡傳上卿為主將畧而稱師者著其暴也滅而舉號及氏者滅見滅之罪著滅者之甚不仁也赤狄

未嘗侵掠晉境非門庭之寇而恃疆暴以滅之其不仁甚矣春秋所以責晉而畧狄也又有異焉者夫伐國之要討其罪人斯止矣案左氏潞子夫人晉景公之甥也鄆舒為政而殺之又傷潞子之目則鄆舒者罪之在也為晉計者執鄆舒輶諸市立黎侯安定潞子改紀其政而返則諸狄服疆域安矣今乃利狄之土滅潞氏以其君歸何義乎

春秋所以責晉而畧狄也

集說

杜氏預曰潞氏子爵也

孔氏穎達曰狄有赤狄白狄就其赤白之間各自別有種類此潞是

國名赤狄之內別種陸氏淳曰啖氏云凡滅國直書滅者罪來滅者不責見滅者也言其力屈而亡且能死社稷矣若自致滅亡之道則異文梁亡是也凡書滅又書其君奔者則兩罪之責其不死社稷也凡書滅又書以歸者則名之責其不能死位又無興復之志也奔而不名者言其位或未絕也隨而歸則名

之言其位必絕也。劉氏敞曰：公羊曰：潞何以稱子潞？子之為善也，躬足以亡爾，非也。潞子稱子，周禮也，非為善而亡也。蓋迷於有爵耳。又曰：穀梁曰：滅國有三術，非也。項遂譚溫梁繒蔡號皆不日，潞子甲氏舒鳩陸渾皆不時，又曰：其日潞子賢也，亦非也。其意以謂稱子則是褒矣，不知爵自當子，非以賢故進之也。豈有國滅身虜而得為賢者哉？高氏閌曰：是時楚肆其疆，圍宋踰年，晉不能救，而反滅狄，利其土地，亦怠於憂天下矣。陳氏傳良曰：滅國之大夫稱人，貶也。故荀林父滅潞，氏隨會滅甲氏，皆不書。又曰：滅國以其君歸，皆稱爵，如楚人滅弦，弦子奔黃，楚人滅頓，以頓子牂歸，楚人滅胡，以胡子豹歸。第言奔者，不名之，以歸者，名之。呂氏大圭曰：楚之圍宋歷三時而不解，晉不能與兵往救，而徒加兵於狄。今年書晉師滅赤狄潞氏，以潞子嬰兒歸，明年書晉人滅赤狄甲氏及留吁。

觀宋人之告急晉侯欲救之而伯宗方以納汙藏疾自諉及晉侯之欲伐狄諸大夫皆以為不可而伯宗乃曰後之人或者將敬奉德義若之何待之嗚呼是誠何心哉其為謀不過陵弱畏彊爾不得志於楚乃求得志於狄晉侯以是賞桓子又以是賞士伯又獻狄俘於周君臣之間矜然德色何暇謀及楚哉備書而義自見矣汪氏克寬曰晉景公會狄於欒函而不討陳滅赤狄潞氏而不救宋不可以言伯矣

秦人伐晉

左傳

秋七月秦桓公伐晉次於輔氏壬午晉侯治兵於稷以畧狄土立黎侯而還及雒魏顆敗秦師

於輔氏獲杜回秦之力人也初魏武子有嬖妾無子武子疾命顆曰必嫁是疾病則曰必以爲殉及卒顆

嫁之曰疾病則亂吾從其治也及輔氏之役穎見老人結草以亢杜回杜回躡而顛故獲之夜夢之曰余而所嫁婦人之父也爾用先人之治命余是以報

輔氏杜注晉地今陝西西安府朝邑縣西北十三里有輔氏城稷杜注晉地河東聞喜縣西有稷山隋置稷山縣今屬山西平陽府縣南五十里有稷神山山下有稷亭卽晉侯治兵處也

集說高氏開曰自二年秦師伐晉晉不報秦今十四年矣此復來伐者乘晉兵畧狄土而闕其虛也故貶而人之

王札子殺召伯毛伯

左傳王孫蘇與召氏毛氏爭政使王子捷殺召戴公及毛伯衛卒立召襄

公羊

王札子者何
長庶之號也

穀梁

王札子者當上之辭也殺召伯毛伯矯王命以

殺之也為天下主者天也繼天者君也君之所

存者命也為人臣而侵其君之命而用之是不臣也

為人君而失其命是不君也君不君臣不臣此天下

所以傾也

胡傳

王臣有書字而言子者王季子是也有書子而

繫名者王子虎是也此稱王札子者穀梁以為

當上之辭也邢侯專殺雍子於朝叔向以殺人不忌

為賊請施邢侯君子以為義王札子之罪當服此刑

而天王不能施之無政刑

矣何以保其國而不替乎

集說

孫氏復曰生殺之柄天子所持也是故春秋非

天子不得專殺王札子人臣也王札子人臣殺

召伯毛伯於朝定王不能禁專執甚焉故曰王札子
殺召伯毛伯以誅其惡杜氏諤曰桓襄之前列國
諸侯交相戰伐列國不稟王命也至此而王臣有相
殺者內之卿士不奉王命也劉氏敞曰穀梁云不
言其何也兩下相殺也非也凡殺大夫稱其者皆君
也豈可曰王札子殺其大夫召伯毛伯乎高氏閌
曰矯王命以殺大臣宜名之以著其罪然書札而不
書王子則與內臣柔溺之類無異書王子札則與王
子虎無異故變文以別之黃氏仲炎曰案左氏王
孫蘇與毛伯召伯爭政使王子捷殺召戴公及毛伯
衛子捷卽札子也威福君之大柄廉恥國之大維今
子弟專殺是君無威福之柄也朝臣爭政是國無廉
恥之維也君無柄國無維所以為東周之衰亂也
季氏本曰一朝殺二大夫而政法不行焉周之所以
日替也不言王殺而以兩下相殺
之辭書則王札子之專殺可知矣

附錄左傳

晉侯賞桓子狄臣千室亦賞士伯以瓜衍之縣曰吾獲狄土子之功也微子吾喪伯

氏矣羊舌職說是賞也曰周書所謂庸庸祇祇者謂此物也夫士伯庸中行伯君信之亦庸士伯此之謂明德矣文王所以造周不是過也故詩曰陳錫載周能施也率是道也其何不濟晉侯使趙同獻狄俘於周不敬劉康公曰不及十年原叔必有大咎天奪之魄矣

瓜衍孝義縣北十里有瓜城屬山西汾州府

秋螽

胡傳

人事感於此則物變應於彼宣公為國虛內以事外去實而務華煩於朝會聘問賂遺之末而

不知務其本者也故戾氣應之六年螽七年旱十年大水十有三年又螽十有五年復螽府庫匱倉廩竭

調度不給而言利
尅民之事起矣

集說何氏休曰從十三年之後上求未已而又歸父
比年再出會內計稅畝百姓動擾之應張氏

洽曰自六年至今三遇蟲災而加之以水
旱此宣公不修德節用愛人之所感也

仲孫蔑會齊高固于無婁

公作年婁無婁杜注杞邑
案公羊作年婁蓋卽隱四年

莒人伐杞所取之邑此時
已為莒邑矣杜注疑有誤

胡傳禮之始失也諸侯非王事而自相會也無以正
之不自天子出矣然後諸侯與大夫會又無以

正之然後大夫與大夫會禮亦不自諸侯出矣田氏
篡齊六卿分晉三家專魯理固然也不能辨於早雖

欲正之具
將能乎

集說 高氏閼曰齊侯在穀則公孫歸父會之齊卿在
無婁則仲孫蔑會之蓋公主齊父矣幸晉楚之
爭而不我及也忽焉而平楚宋俾歸父請於齊侯齊
侯則疑我之從楚也蔑於是復會以修舊好焉趙
氏鵬飛曰魯宣自齊惠之歿事齊稍怠惟公孫歸父
兩會齊侯而已公不朝齊也齊蓋有以議魯矣高固
蓋婚於魯知齊之謀故會仲孫蔑於無婁為魯謀而
解齊之紛也終宣公之世卒不被齊兵者無婁之會
有力焉及成公即位而有西鄙之伐矣用是知高固
之會為魯謀齊也家氏鉉翁曰高固自以國事出
宣使大夫侯之於途諂事外臣書之以貶李氏廉
曰大夫會大夫始於叔彭生會晉郤缺于承匡而胡
氏獨發傳於此條之下未詳其說張氏亦曰大夫
相會蓋始於此豈非以二子非國事而私相會乎

初稅畝

左傳

初稅畝非禮也穀出
不過藉以豐財也

公羊

初者何始也稅畝者何履畝而稅也初稅畝何
以書譏何譏爾譏始履畝而稅也何譏乎始履

畝而稅古者什一而藉古者曷為什一而藉什一者
天下之中正也多乎什一大桀小桀寡乎什一大貉

小貉什一者天下之中正
也什一行而頌聲作矣

穀梁

初者始也古者什一藉而不稅初稅畝非正也
古者三百步為里名曰井田井田者九百畝公

田居一私田稼不善則非吏公田稼不善則非民初
稅畝者非公之去公田而履畝十取一也以公之與

民為已悉矣古者公田
為居井竈蔥韭盡取焉

胡傳

孟子曰耕者助而不稅則天下之農皆悅而願
耕於其野矣書初稅畝者譏宣公廢助法而用

稅也殷制公田為助助者藉也周因其法為徹徹者通也其實皆什一也古者上下相親上之於下則曰駿發爾私終三十里惟恐民食之不給也下之於上則曰雨我公田遂及我私惟恐公田之不善也故助法行而頌聲作矣世衰道微上下交惡民惟私家之利而不竭力以奉公上惟邦賦之入而不惻但以利下水旱凶災相繼而起公田之入薄矣所以廢助法而稅畝乎初者志變法之始也其後作丘甲用田賦至於二猶不足則皆宣公啓之也故曰作法於涼其弊猶貪作法於貪弊將若何有國家者必欲克守成法而不變其必先務本乎

集說

何氏休曰頌聲者太平歌頌之聲帝王之高致也民以食為本饑寒竝至雖堯舜躬化不能使

野無寇盜貧富兼并雖皋陶制法不能使疆不陵弱是故聖人制井田之法而口分之一夫一婦受田百

畝以養父母妻子五口為一家公田十畝卽所謂什一而稅也廬舍二畝半凡為田一項十二畝半八家而九項共為一井故曰井田廬舍在內貴人也公田次之重公也私田在外賤私也井田之義一曰無洩地氣二曰無費一家三曰同風俗四曰合巧拙五曰通財貨因井田以為市故俗語曰市井種穀不得種一穀以備災害田中不得有樹以妨五穀還廬舍種桑荻雜菜畜五母雞兩母豕瓜果種疆畔女上蠶織老者得衣帛焉得食肉焉死者得葬焉多於五口名曰餘夫餘夫以率受田二十五畝十井共出兵車一乘司空謹別田之高下善惡分為三品上田一歲一墾中田二歲一墾下田三歲一墾肥饒不得獨樂墾墾不得獨苦故三年一換主易居財均力平兵車素定是謂均民力疆國家在田曰廬在邑曰里一里八十戶八家共一巷中里為校室選其耆老有高德者名曰父老其有辯護伉健者為里正皆受倍田得乘

馬父老比三老孝弟官屬里正比庶人在官吏民春
夏出田秋冬入保城郭田作之時春父老及里正旦
開門坐塾上晏出後時者不得出算不持樵者不得
入五穀畢入民皆居宅里正趨緝績男女同巷相從
夜績至於夜中故女工一月得四十五日作從十月
盡正月止男女有所怨恨相從而歌饑者歌其食勞
者歌其事男年六十女年五十無子者官衣食之使
之民間求詩鄉移於邑邑移於國國以聞於天子故
王者不出牖戶盡知天下所苦不下堂而知四方十
月事訖父老教於校室八歲者學小學十五者學大
學其有秀者移於鄉學鄉學之秀者移於庠庠之秀
者移於國學學於小學諸侯歲貢小學之秀者於天
子學於大學其有秀者命曰進士行同而能耦別之
以射然後爵之士以才能進取君以考功授官三年
耕餘一年之蓄九年耕餘三年之積三十年耕有十
年之儲雖遇唐堯之水殷湯之旱民無近憂四海之

內莫不樂其業故曰頌聲作矣杜氏預曰公田之法十取其一今又履其餘畝復十收其一故哀公曰二吾猶不足遂以為常故曰初楊氏士勛曰徐邈以為除去公田之外又稅私田之十一也趙氏匡曰公田之外又履步其田十又稅其一論語云二吾猶不足是也朱子曰商人以六百三十畝之地畫為九區區七十畝中為公田其外八家各授一區但藉其力以耕公田而不復稅其私田周制一夫受田百畝而與同溝共井之人通力合作計畝均分大率民得其九公取其一故謂之徹魯自宣公稅畝又逐畝什取其一則為十而取二矣胡氏寧曰什一天下之中正不可寡亦不可多也今宣公擅變先王之仁政而滅其所以為中於其國與民者既借其力以耕公田又理民田而稅其私畝書曰初稅畝者志亂常之始自是而不復矣黃氏仲炎曰古者井田八家皆私百畝其中為公田八家耕之以奉其上所謂

藉也藉之為言借也借民力為之而非稅也今魯初
稅畝是於公田之外又稅其私畝也孔子曰始作俑
者其無後乎壞井田之制開厚斂之門使民不聊生
國無善治蓋自是始矣家氏鉉翁曰宣公以旱乾
水溢蟲螟之災無歲無之用度不給乃履畝而征之
謂之稅夫助而不稅周制也今以稅易助成王周公
之罪人也井田之法自此始壞李氏廉曰趙子賦
稅例三此年稅畝成元年作丘甲哀十二年用田賦
也趙子改草例十初獻六羽躋僖公初稅畝作丘甲
立武宮作三軍舍中軍立煬宮從祀先公用田賦也
凡變常之事皆書革而上者比於治革而下者比於
亂察其所革而興亡兆矣汪氏克寬曰三代制田
取民雖皆不過什一而其為法至周始詳密而周盡
為人君者苟能謹守其中正之制則可以足國而裕
民矣今宣公以募得國既不能修德以弭天災而感
水旱螽蟥之變又不能斂奢以節國用而貽饑饉空

乏之憂於是一旦秦先王之制增稅畝之法作法於
貪其害有不可勝言矣易世而成公作丘甲而賦民
之力有加於古迄春秋之終而哀公用田賦而民財
民力殆無遺餘皆肇於宣公之作俑也使諸國效
尤鄭子產則作丘賦魏文侯則增租賦卒至暴秦開
阡陌更賦稅而先王之制窮今不復豈非宣公首禍
以致然乎春秋書初者二初獻六羽喜禮之復
正也初稅畝憂田制之變古也美惡不嫌同辭
案稅畝之說公穀二傳皆以為稅而取一但廢古之
助法爾杜氏預以為既取其公田又稅其私田十之
一則為十而取二矣胡傳主公穀
而朱子從杜氏姑竝存之以俟考

冬蠓生

蠓悅
全反

胡傳

始生曰蠓既大曰螽秋螽未息冬又生子災重
及民也而詳志之如此者急民事謹天災仁人

之心王者之務也遇天災而不懼忽民事而不修而又為繁政重賦以感之國之危無日矣

集說

孫氏復曰秋中之蝥未息冬又生子重為災孫氏覺曰蝥者蝥之子春秋之秋夏時之夏也

春秋之冬夏時之秋也蝥為災於夏而蝥生於秋一歲而再為災故謹志之爾案左氏公羊皆曰幸之以蝥生於冬物皆已收而不為災也案秋乃五穀大成之時安得曰不為災乎但生而不為災亦何用書之乎穀梁以為稅畝之災亦牽合之論也王氏葆曰蝥蝥之子爾雅謂蝥蝥說者以為蝥之有子不因牝壯腹中陶冶而自生故蝥曰蝥蝥皆蝗類故春秋記為災黃氏仲炎曰蝥始生者為蝥蝥蝥蔽天或來自他處不必見其生也故不曰蝥生蝥生於境內見其生也故曰蝥生

饑

胡傳

春秋饑歲多矣書於經者三而宣公獨有其二何也古者三年耕餘一年之畜九年耕餘三年

之食雖有凶旱民無菜色是歲雖螽蟥而遽至於饑者宣公為國務華去實虛內事外煩於朝會聘問賂遺之末而不敦其本府庫竭矣倉廩匱矣水旱螽蟥天降饑饉亦無以振業貧乏矣經所以獨兩書饑以示後世為國之不可不敦本也

集說

張氏洽曰宣兩書饑一在大水之後一在螽蟥之後甚言國無蓄積而民無以生也黃氏仲

炎曰春秋書饑者凶荒之甚者也莊公二十八年大無麥禾亦饑歲也而不言饑蓋當時雖無素備然猶知告糴於齊以為凶荒之救故其民猶未至於流亡也今宣公歲饑見於再書者是其國既無蓄積之備又無救荒之策坐視其民之饑而死爾蓋必如詩所謂饑饉降喪民卒流亡孟子所謂凶年飢歲老弱轉

乎溝壑壯者散而之四方者矣故春秋以饑書也嗚呼使民至此烏在其為民父母哉家氏鉉翁曰螽生自一時而言也饑自一歲而言也汪氏克寬曰據隱公再書螟桓公再大水又螽莊公三大水無麥苗大無麥木僖公不雨螽大旱文公三書饑三時不雨又螽成公大水哀公三書螽皆不書饑

戊辰定王十

十有六年

晉景七年齊頃六年衛穆七年蔡文十九年鄭襄十二年曹宣二年

陳成六年杞桓四十四年宋文十八年秦桓十二年楚莊二十一年

春王正月晉人滅赤狄甲氏及留吁

甲氏留吁杜注赤狄別種案胡氏注

留吁赤狄之殘邑晉滅赤狄甲氏留吁遂為晉邑謂之純留水經注云絳水經屯留故城即故留吁國也今山西潞安府屯留縣南十三里純留故城是也

左傳

十六年春晉士會帥師滅赤狄甲氏及留吁鐸辰三月獻狄俘晉侯請於王戊申以黻冕命士

會將中軍且為大傅於是晉國之盜逃奔於秦羊舌職曰吾聞之禹稱善人不善人遠此之謂也夫詩曰戰戰兢兢如臨深淵如履薄冰善人在上也善人在上則國無幸民諺曰民之多幸國之不幸也是無善人之謂也

鐸辰杜注留吁之屬當在潞安府境

胡傳

案左氏董是役者士會也上將主兵其稱人貶辭也甲氏潞之餘種留吁其殘邑也伯禽征徐

夷東郊既開而止宣王伐獫狁至於太原而止武侯征戎瀘服其渠帥而止必欲盡殄滅之無遺種豈仁人之心王者之事乎士會所以貶而稱人也

集說

杜氏預曰甲氏留吁赤狄別種晉既滅潞氏今又并盡其餘黨高氏閔曰書及者所以別二

族

薛氏季宣曰攢函之會未幾而三滅狄大無信也張氏洽曰晉自不得志於楚而一意用武於狄

兼并其地士會書人深貶之也趙氏鵬飛曰甲氏留吁潞氏之別種也赤狄之雄曰潞氏晉既滅之變

其汚俗訓其頑民豈必盡其類而滅之俾無遺種哉甲氏留吁之滅蓋亦過矣王氏貫道曰楚禍逼人

晉乃貪拓地於狄以自肥規模如此其何能伯家氏鉉翁曰晉滅潞氏則曰討有罪也既滅之矣而復

用師不已是必欲窮極其黨類盡滅之而後已夫豈仁人之所忍為故書人以貶之楚人圍宋坐視不救

諉曰鞭長不及馬腹又滅潞氏又滅甲氏留吁可已而不已志存乎逐利而不能赴人之急謂諸侯何

夏成周宣榭火

榭公作謝火公穀作災

左傳

夏成周宣榭火人火之也
凡火人火曰火天火曰災

公羊

成周者何東周也成周
宣謝災何以書記災也

胡傳

成周天子之東都榭者射堂之制其堂無室以
使射事故凡無室者皆謂之榭貴戚擅殺大臣

而天子不討王室不復能中
興矣人火之天所以見戒乎

集說

杜氏預曰傳例曰人火之也成周洛陽宣榭講
武屋別在洛陽者范氏甯曰成周東周今之

洛陽宣榭宣王之榭爾雅曰室有東西廂曰廟無東
西廂有室曰寢無室曰榭傳例曰國曰災邑曰火

孔氏穎達曰楚語云先王之為臺榭也榭不過講軍
實臺不過望氛祥知榭是講武屋也成周周之下都

此榭別在洛陽講習武事則往就之爾雅釋宮云無
室曰榭又云闔謂之臺有木者謂之榭李巡曰臺積

土為之所以觀望臺上有屋謂之榭則榭是臺上之
屋居臺而臨觀講武故無室而歇前歇前者無壁也
如今廳是也李氏堯俞曰廟不應有榭榭不應藏
樂榭者講武之所宣者其宣王之所為乎至是歷十
二世王業日壞求其如宣之威既不可得而見而王
之迹又煨燼蓋痛之也劉氏敞曰公羊曰外災不
書此何以書新周也非也穀梁曰周災不志亦非也
宋災猶志況周災乎來告則書耳孫氏覺曰公穀
皆云樂器之所藏榭藏樂器則何獨名宣乎黃氏
仲炎曰臺望氛祥榭講軍實成周之地有宣榭者興
王之遺迹也宣王承幽王之後積勢衰弱於是修車
馬備器械南征北討中興王業其用武於四方則必
有講肄之所即成周宣榭是也宣榭火興王之迹泯
矣故聖人重之而書示不忘古也汪氏克寬曰書
外災者五皆以國書蓋災及於宗廟朝市而非一處
也獨此書宣榭以責王室不謹於火備雖人火焚之

而弗能救忽慢先祖之罪著矣又曰成周乃王城下
都之總名分言之則澗水東渥水西為王城都邑在
焉渥水東下都為成周商民居焉合言之則總曰成
周故洛誥多士序言往營成周成周既成是也杜氏
以為講武屋外傳亦云榭不過講軍實竊疑宣王南
征北討講武於此二傳謂樂器存焉非也榭既無室
何以藏樂器乎

案公羊以宣榭為宣宮之榭何氏休謂宣王中興其
廟不毀非也宣廟宜毀久矣卽或未毀何不在京師
而在成周乎胡傳以廟制似榭故謂之榭亦非也爾
雅所紀廟寢臺榭規模判然不同何得混而一之乎
杜氏預釋榭為講武屋而孔氏穎達引楚語以證之
此不易之論也雖宣字之義有所未及而成周為周
之東都吉日車攻咏宣王講武之盛則宣榭之為宣王無疑矣

秋郊伯姬來歸

左傳

秋郊伯姬來歸出也

胡傳

案左氏郊伯姬來歸出也內女出書之策者男女居室人之大倫也婚姻之禮廢則夫婦之道

苦淫辟之罪多矣復相棄背喪其配耦氓之詩所以刺衛日以衰薄室家相棄中谷有蕓所以閔周易序咸恒為下經首春秋內女出夫人歸凡男女之際詳書於策所以正人倫之本也其旨微矣

集說

范氏甯曰為夫家所遣啖氏助曰內女見出皆書來歸大其事也趙氏匡曰為婦而出著

其非也呂氏本中曰婦人既嫁而出人道之大者故書之高氏閔曰為夫所出見棄而歸也薛氏

季宣曰參譏之也黃氏仲炎曰讀詩至葛覃則知婦人事君子之本苟失斯道至於孤嫠宜矣故書以

戒婦人也 家氏鉉翁曰女生而願為有家故嫁者謂之歸人道之常也見出而曰來歸著其變也 吳氏澂曰常事不書故歸邾不書 汪氏克寬曰春秋書邾伯姬杞叔姬來歸所以譏父母之訓育弗至致內女之婦德有虧而亦責邾杞之君失齊家之道而棄其伉儷也然杞叔姬書卒書杞伯逆其喪歸則叔姬之出必有不當絕者而邾伯姬不書卒不書喪歸則出者與出之者其罪皆著矣

附錄左傳

為毛召之難故王室復亂王孫蘇奔晉晉人為復之 冬晉侯使士會平王室定王享

之原襄公相禮穀烝武子私問其故王聞之召武子曰季氏而弗聞乎王享有體薦宴有折俎公當享卿當宴王室之禮也武子歸而講求典禮以修晉國之法

集說

王氏錫爵曰會為使臣而不
知王室之禮此晉之恥也

冬大有年

穀梁

五穀大熟
為大有年

胡傳

程氏曰大有年記異也旱乾水溢饑饉荐臻者災也山崩地震彗孛飛流者異也景星甘露醴

泉芝草百穀順成者祥也大有年上瑞矣何以為記異乎凡災異慶祥皆人為所感而天以其類應之者也人事順於下則天氣和於上宣公弑立逆理亂倫水旱螽蟥饑饉之變相繼而作史不絕書宜也獨於是冬乃大有年所以為異乎夫有年大有年一耳古史書之則為祥仲尼筆之則為異此言外微旨非聖人莫能修之者也

集說

孫氏覺曰大者非常之辭有者不宜有也春秋書有年皆在桓宣之時聖人之意可知矣張

氏洽曰宣公奪嫡而立王誅不加而天災饑饉之禍
屢降今年大有年亦所以記咎徵常多故曰記異也
年所以為異也二百四十二年書有年者二豈得謂
祥乎汪氏克寬曰七年大旱十年大水六年蠡十
三年又蠡十五年蠡又蛟生十年饑十五年又饑又
曰桓公有年之後遠狩于郎犯害民物宣公大有年
之先履畝而稅重困農民二公得國於不義又不能
修德以撫下殘虐國本恬不為憂春秋之書有年既
以紀天時之反常又以憫魯國之民而幸其僅有年
也不爾則
人類滅矣

已定王十
已五年

十有七年

晉景八年齊頃七年衛穆八年蔡
文二十年鄭襄十三年曹宣三年

陳成七年杞桓四十五年宋文十
九年秦桓十三年楚莊二十二年

春王正月庚子許男錫我卒

丁未蔡侯申卒

夏葬許昭公葬蔡文公

胡傳

宣公為國務華而無忠信誠慤之心計利而不

知禮義邦交之實哀死送終獨厚於齊而利害

不切其身者皆闕如也大則薄其君親次則忽於盟

主又其次若秦若衛若滕雖來告訃怠於禮而不會

也比事以觀義自見矣

集說

張氏洽曰春秋備書而宣公不謹於事上交鄰

喪而魯往弔焉見魯亦與楚通矣

六月癸卯日有食之

己未公會晉侯衛侯曹伯邾子同盟于斷道

斷音短
斷道杜注

晉地今山西沁
州東有斷梁城

左傳

春晉侯使郤克徵會于齊齊頃公帷婦人使觀
之郤子登婦人笑於房獻子怒出而誓曰所不

此報無能涉河獻子先歸使欒京廬待命於齊曰不
得齊事無復命矣郤子至請伐齊晉侯弗許請以其
私屬又弗許齊侯使高固晏弱蔡朝南郭偃會及欽
孟高固逃歸夏會于斷道討貳也盟于卷楚辭齊人
晉人執晏弱於野王執蔡朝於原執南郭偃於溫苗
賁皇使見晏桓子歸言於晉侯曰夫晏子何罪昔者
諸侯事我先君皆如不逮舉言羣臣不信諸侯皆有
貳志齊君恐不得禮故不出而使四子來左右或沮

之曰君不出必執吾使故高子及斂孟而逃夫三子者曰若絕君好寧歸死焉為是犯難而來吾若善逆彼以懷來者吾又執之以信齊沮吾不既過矣乎過而不改而又久之以成其悔何利之有焉使反者得辭而害來者以懼諸侯將焉用之晉人緩之逸

卷楚杜注即斷道野王杜注
野王縣屬河內今為懷慶府治

穀梁同者有同也
同外楚也

胡傳書同盟者志同欲也大國率之小國畏威而從命非同欲也小國訴之大國勉彊而應焉非同欲也若斷道之盟諸侯同心謀欲伐齊釋其忿怒非有不得已而要之者也或以為會同天子之事築宮為壇設方明如方嶽之盟故書同疑其說之誤矣

集說

程子曰諸國同心欲伐齊故書同盟陳氏傳

者寡矣

趙氏鵬飛曰初晉為清丘之盟以求諸侯

而以大

大夫主之諸侯亦以大夫聽命宜其不足以結

信也

陳人不會宋師伐之而衛人叛盟伐宋卒之召

楚人之兵

圍宋者九月不解而宋與楚平其失皆本

於清丘之會

晉景不親之而以大夫為會也今楚兵

雖退而宋已為楚北方無宋藩籬益薄矣

晉侯懼而

復為斷道之盟

所以固魯衛曹邾之心也楚方虎視

列國宋既屈而為楚諸侯危矣

幸晉景能收其餘以

為宗主故皆舉其爵而予之以振霸主之餘燼也

家氏鉉翁曰爵五國之君貴之也是時楚燄大張晉

虜日甚清丘斷道兩盟皆幸其猶能同也

李氏廉

曰此盟諸傳皆以為謀齊而穀梁獨以為外楚蓋拘

於同尊同外之例恐非事實然此舉出於宋及楚平

之後而徵會於齊則初意為盟誠因懼楚但郤克既

怒齊遂就起伐齊之謀耳穀說亦不為無據汪氏
克寬曰魯衛曹邾皆迫於齊故同有伐齊之心而晉
又欲討其貳會逢其適觀明年晉衛伐齊又二年四
國與齊戰鞏則此盟為同謀伐齊可知矣鞏戰邾人
不與者國小不能以兵從也黃氏正憲曰魯衛曹
邾皆相鄰之國是時宋與楚平若以宋為嚮導而東
侵則四國實為門戶而唇齒相依者也斷道之盟不可已也矣

案斷道之盟諸傳以為謀齊穀梁以為外楚考其情
事二說並可用也宋楚既平南風方競曹衛適當其
衝晉為盟主合諸侯以共籌之則外楚者其本謀也
卻克徵會而齊侯不至僅使四大夫如會晉人怒而
執之則伐齊之舉亦即於此盟定其謀也故李氏廉兼取二說

附錄左傳

秋八月晉師還范武子將老召文子曰
變乎吾聞之喜怒以類者鮮易者實多詩

秋公至自會

曰君子如怒亂庶遄沮君子如祉亂庶遄已君子之喜怒以已亂也弗已者必益之邵子其或者欲已亂於齊乎不然余懼其益之也余將老使邵子逞其志庶有易乎爾從二三子唯敬乃請老邵獻子為政

集說

汪氏克寬曰宣公會盟而書至黑壤之會事齊而不事晉危晉之見討而不得釋也斷道之盟

背齊而與晉謀伐齊危齊人之見討也宣自即位以來卑屈事齊惟恐獲戾末年遽有伐之之意初乞師於楚尋復求助於晉齊近於魯而遠借援於大國以間朝夕之好爰爰乎其殆哉

冬十有一月壬午公弟叔肸卒

肸許乙反

左傳

冬公弟叔肸卒公母弟也凡大子之母弟公在曰公子不在曰弟凡稱弟皆母弟也

殺梁

其曰公弟叔肸賢之也其賢之何也宣弑而非之也非之則胡為不去也曰兄弟也何去而之

與之財則曰我足矣織屨而食終身不食宣公之食君子以是為通恩也以取貴乎春秋

胡傳

稱弟得弟道也稱字賢也何賢乎叔肸宣弑而非之也非之則胡為不去也兄弟無絕道故雖

非之而不去也與之財則曰我足矣終身不食宣公之祿君子以是為通恩也論情可以明親親言義可

以厲不執所以取貴乎春秋書曰公弟而稱字以表之也公子為正大夫而書卒貴也不為大夫而持書

卒賢也或以為叔肸寵弟在宣公有私親之愛故生而賜氏俾世其卿則其說誤矣誠使叔肸有寵生而

賜氏則是貴戚用事之卿豈有不見於經者齊年鄭語在外之見於經者季友仲遂在內之見於經者勢

必與聞政事執國命矣況宣公之時煩於聘問會朝之禮遂蔑季孫歸父交於鄰國眾矣而獨叔肸不與

焉其非生而賜氏
俾世其卿亦明矣

集說

楊氏士勛曰衛侯之弟鱣去君傳云合於春秋

或出或處或默或語鱣以衛侯惡而難親恐罪及已
故棄之而去使君無殺臣之惡兄無害弟之愆故得
合於春秋此叔肸以君有大逆不可受其祿食又是
孔懷之親不忍奮飛使君臣之節兩通兄弟之情俱
暢故亦取貴於春秋叔肸書字鱣直稱名者叔肸內
可以明親親外足以屬不軌比鱣也賢乎遠矣故貴
之稱字鱣雖合於春秋無大善可應故直書名而已
陸氏淳曰啖氏云叔肸非卿也卒而書之嘉其行
合於義故特曰公弟明其得弟道也陳氏傅良曰
公弟者何非見大夫也非大夫而卒賢之也賢之所
以惡宣公也黃氏仲炎曰其曰公弟猶曰公子也
以先君之子稱之故曰公子以今君之兄弟稱之故

曰公弟趙氏鵬飛曰內臣卒者二十有三未有書
公弟而且字之者今公弟叔肸卒春秋之變文惟此
一而已肸恥食汚君之祿而不仕是以聖人異之書
曰公弟且字之以別其賢也程氏端學曰此記叔
肸之始也肸文公子惠伯也肸之子公孫嬰齊嬰齊
之子叔老老之子叔弓弓之子叔輒叔輒之子叔
詣叔弓之曾孫叔還李氏廉曰兄弟先公之子當
稱公子諸侯之兄弟當稱字其稱弟稱名若齊年鄭
語衛黑背陳招之類者罪其兄有寵愛之私亦罪其
人之恃寵而當國也陳先秦鍼宋辰衛鱄佞夫之類
罪其兄薄友愛之義亦罪其人之不能盡道以取禍
也蔡季許叔紀季蔡叔魯季子等稱字者春秋之正
例無貶辭也無貶即賢之也其不稱公子者不以貴
戚累之其不稱弟者不以私與薄累其兄也止繫國
者言與國一體也季子不可稱國則以子繫之美之
也叔肸書字而書弟所以異於其餘稱弟者也汪

氏克寬曰佞夫齊年鄭語宋辰秦鍼陳光招衛黑背
縛稱弟不稱字許叔蔡叔蔡季紀季稱字不稱弟又
曰成二年書公孫嬰齊帥師自是終春秋之世世為
大夫蓋叔肸辭祿不受而宣公以母弟懿親命其子
為大夫也

案季友叔肸皆內兄弟之賢者也友有定亂之勲肸
有通恩之美春秋於其卒也書名書字以褒之未可
以仲遂為比也友稱公子而肸稱公弟者友卒於僖
公之時不得以弟稱也胡傳於仲遂季友皆以為生
而賜氏俾世為卿於叔肸則極輶其非今考叔肸卒
後未逾三年而其子嬰齊帥師厥後世為大夫蓋肸
不受祿而宣公加恩於子孫則賜氏之說亦未可
斷以為必無也胡傳相沿已久姑存之以俟考

庚定王十
年六年

十有八年

晉景九年齊頃八年衛穆九年蔡
景公固元年鄭襄十四年曹宣四

年陳成八年杞桓四十六年宋文二十年秦桓十四年楚莊二十三年

春晉侯衛世子臧伐齊

左傳

十八年春晉侯衛太子臧伐齊至於陽穀齊侯會晉侯盟於繒以公子彊為質於晉晉師還蔡

朝南郭
偃逃歸

胡傳

保國以禮為本者也齊頃公不謹於禮自已致寇所謂國必自伐而後人伐之矣

集說

薛氏季宣曰齊不與於諸侯之會而伐之也書衛之世子代父掌兵非子道也趙氏孟何曰

晉文公卒齊不復從晉盟晉是以不競於楚而歷三君問不及齊齊東方大國也晉不得齊則諸侯不附景公為斷道之會始徵會於齊而齊侯不至於是自將以伐齊庶乎知所伐矣家氏鉉翁曰齊自懿惠

以來比世再篡怙彊妄行漁獵小國其罪亞於楚晉
景儒無立志忽興師伐齊亦足聳聽春秋何貶焉
吳氏激曰會朝與伐國皆非世子之所宜也汪氏
克寬曰齊自翟泉以來不與於晉之會盟而恃其彊
大侵暴小國是以晉景欲振奕世之伯業始則君率
衛以伐齊既而正卿舉合境之兵偕魯衛曹以戰齊
蓋非專以婦人笑客之故也金氏賢曰斷道之盟
欲以外楚義也頃公不與曲在齊矣故書晉侯以許
其伐黃氏正憲曰齊自翟泉以來恃彊輕晉魯會
無婁因晉微齊也而竟置不報故斷道之盟亦不與
焉此晉之所以不
圖楚而謀齊也

案晉為盟主徵會於齊而齊不至晉侯伐之宜矣胡
傳謂上卿執國命取必於君以行其私春秋書之以
見伐者之罪今考左氏所載卻獻子請伐齊晉侯弗
許請以其私屬又弗許則陽穀之役豈肯親帥大衆

而為郤克報怨乎若四國戰
鞏則郤克之逞志於齊也

公伐杞

集說徐氏彥曰公伐莒萊邾杞凡近魯小國無不被
伐公之惡也悉矣高氏閌曰杞自文十六年
來朝而不復至故伐之已不修德而欲人朝已亦不
思之甚矣趙氏鵬飛曰杞世婚於魯杞桓公魯出
而且娶於魯僖文之世各一來朝惟宣公殺惡及視
以自立杞伯蓋以宣為僖文之罪人未嘗朝焉宣公
憾之故躬擐甲兵以伐杞君子不以杞被伐為不幸
適所以張杞桓之義也李氏廉曰自此以前侵伐
十四凡九書公自此以後
後侵伐十二惟四書公

夏四月

附錄左傳

夏公使如楚乞師欲以伐齊

秋七月邾人戕鄆子于鄆

戕音牆鄆穀作繒

左傳

秋邾人戕鄆子于鄆凡自虐其君曰弑自外曰戕

公羊

戕鄆子于鄆者何殘賊而殺之也

穀梁

戕猶殘也殺也

胡傳

戕者殘賊而殺之也于鄆者刺臣子不能救君難也重門擊柝康陸等威侍衛守禦之嚴奚至

於坐使其君為邾人殘賊殺之而莫禦乎邾人蓋嘗執鄆子用之則不共戴天之世讎也既不能復又使

邾人得造其國都而戕殺其君曰于鄆者所以深責鄆之臣子至此極也

集說

何氏休曰支解節斷之故變殺言戕戕則殘賊惡無道也言于鄆者刺鄆無守備薛氏季宣

曰戕者殺異國之君也鄆力足以加鄆而屢無道於鄆則魯以疆大加鄆蓋出乎兩者也汪氏克寬曰

邾稱人蓋邾子而貶之也使果微者則當書曰盜殺鄆子某今日邾人則為邾子明矣邾文公用鄆子邾

定公戕鄆子皆黜稱人惡其奕世兇虐滅人理而悖天常也蔡靈蔡昭見殺則錄其名而鄆之二君不名

蓋無罪而受禍爾

甲戌楚子旅卒

旅穀作呂楚始書卒

左傳

楚莊王卒楚師不出旣而用晉師楚於是乎有蜀之役

蜀杜注魯地泰山博縣西北有蜀亭在今山東濟南府泰安州西

公羊

何以不書葬吳楚之君不書葬辟其號也

胡傳

楚僭稱王不書葬者恐民之惑而避其號是仲尼削之也

集說

何氏休曰旅即莊王也葬從臣子辭當稱王故絕其葬孔氏穎達曰禮坊記曰天無二日國

無二王示民有君臣之別春秋不稱楚越之王喪恐民之惑也鄭康成云楚越之君僭號稱王不稱其喪

謂不書葬也孫氏復曰不書葬者貶之也吳楚僭極惡重王法所誅故皆不書葬以貶之高氏閌曰

前此不書楚子之卒此書之者以楚入為害甚於前日列國不能自正乃相為朝聘相與盟誓相通問好

故自此詳志其卒也家氏鉉翁曰楚入春秋百年武文成穆未有窺周室之心也楚莊睥睨周鼎欲遂

僭王之夙心故春秋書法為之一變其存也書之曰子其歿也卒之曰子而不葬抑之也示共主在周雖

欲僭而莫得也論者乃謂春秋進之是以爵之貴之
是以終之非知春秋者也汪氏克寬曰魯史必書之
楚王某卒聖人草其僭號故曰楚子某卒又曰楚至
僖二十一年成王會孟始書子至莊王始書卒吳至
襄十二年壽夢始書子書卒徐至昭四年駒王章羽
書子又曰朱子綱目於七雄稱王皆書曰某君漢以
後僭國稱帝者皆書曰某主蓋取法於春秋吳楚書
子之義也然吳楚稱子特從天子所封之本爵而黜
其僭號也後世僭國非有朝廷封爵而自稱皇帝故
但曰某主耳王氏錫爵曰楚莊亦一時之雄也然
肆其疆暴而宋陳鄭皆被其毒所為貪欲之事非有
假仁義以正天下之功說者乃以桓文並稱豈不誤
哉

案楚不書葬胡傳從公羊以為避其號者是也謂楚
吳徐皆降稱子與滕侯杞伯之稱子同例則義有未

安蓋滕杞爵本侯伯為時王所黜故皆書子非聖人降之也楚吳徐僭號稱王乃時王之所不能禁者於是從其始封之爵而書子以正其僭逆之罪亦非聖人降之也必謂春秋進退諸侯則先已自蹈於僭何以正人之僭乎
今故刪節胡傳

公孫歸父如晉

左傳

公孫歸父以襄仲之立公也有寵欲去三桓以張公室與公謀而聘於晉欲以晉人去之

胡傳

宣公因齊得國故刻意事之雖易世猶未怠也及頃公不能謹禮怒晉魯上卿而卻克當國決

策討之晉方彊盛齊少懦矣於是背齊而事晉其於邦交以利為向背無忠信誠慤之心者也案左氏歸父欲去三桓以張公室與公謀而聘於晉欲以晉人去之夫輕於背與國易於謀大家而不知其本未有

能成而無悔也然則公室不可張乎務引其君當道
正心以正朝廷禮樂刑政自己出也其庶幾乎必欲
倚外援以去之是去疥癩
而得腹心之疾也庸愈哉

集說 家氏鉉翁曰歸父為宣公謀去三家以張公室
其心雖未可知其事未見非正而謀之不臧乃

欲因大國之力鋤而去之豈不思晉之諸卿自趙盾
秉權而後怙黨植私漸至不制魯宣欲去彊宗夫豈
晉卿之所願哉宜其謀之不遂也
李氏廉曰宣公聘晉止此一事

冬十月壬戌公薨于路寢

穀梁 正寢也

集說 王氏元杰曰宣公在位十有八年大義已虧於
國何有嫡母無可絕之理致使哭而歸齊兄弟

有萬天倫之恩實與聞其弑逆賂田援齊而定位居喪逆女而圖婚七年五朝於齊甚以疆臣配女十載一修聘禮至侯王臣下徵卑屈為媚齊之謀怠傲無事晉之志放利而取向取繹逞兵於伐莒伐邾見辱於黑壤之盟掩惡為平州之會迨至螽蟥繼起饑饉荐臻方且履敵而稅之民力於是竭矣會晉斷道之盟乃欲去三桓以張公室宣公肉未及寒東門氏已不血食矣獲終正寢蓋亦幸焉汪氏克寬曰桓公弑立則斃於齊宣公亦弑立而獲正終然魯君自是失政而三家彊盛不復可制矣

歸父還自晉至笙遂奔齊

笙公穀作榿笙杜注魯境也

左傳

冬公薨季文子言於朝曰使我殺適立庶以失大援者仲也夫臧宣叔怒曰當其時不能治也

後之人何罪子欲去之許請去之遂逐東門氏子家還及笙壇帷復命於介既復命袒括髮即位哭三踊

而出遂奔齊書曰歸父還自晉善之也

公羊

還者何善辭也何善爾歸父使於晉還自晉至

走之齊

穀梁

還者事未畢也自晉事畢也與人之子守其父

遂奔齊遂繼事也

胡傳

仲尼稱孟莊子之孝其不改父之臣與父之政

是難能也又曰三年無改於父之道可謂孝矣夫仁人孝子於其父之臣非有大不可如晉悼公於夷羊五之屬必存始終進退之禮而不遽也歸父以君命出使未反而君薨在聘禮有執圭復命于殯之文升自西階子臣皆哭情亦戚矣今宣公猶未殯而

東門氏逐忍乎哉書曰歸父還自晉者已畢事之辭也至筮遂奔齊者罪成公君臣死君而忘父逐之亟也穀梁子曰捐殯而奔其父之使者是亦奔父也得經意矣君薨家遺方寸宜亦亂而造次顛沛不失禮焉非志於仁者弗能也辭繁而不殺歸父之善自著矣比事以觀則見當國者有無君之心此春秋所以作不可不察也

集說高氏閼曰先君未殯而逐其臣是死其君而忘其父也歸父既畢使事盡哀而奔是知死亡之不免而能不失度於顛沛造次之時異乎他大夫之奔矣朱子曰人固有用父之臣者然稍拂他私意便自容不得胡氏寧曰出使而反或曰復或曰還復者事未畢還者事已畢之辭也歸父受命而聘晉雖已至於晉而反矣然而未復命於殯則不可謂已終事也歸父欲入而復命則必見殺見殺則增君之

惡其出奔賢於人也況又壇帷復命於介袒括髮即位哭三踊而出不失禮乎曰還曰至以終事之辭免歸父也家氏鉉翁曰季氏不以君薨為戚肆出悖言追讎既往首逐其腹心用事之臣此時此心犯上作亂何所不為春秋於公薨之後繼書歸父奔齊所以著季氏不臣之跡其旨微矣自茲以往政在彊家魯君不復能君禍端亂本實肇於此彼篡人之國季氏亦竊其國出爾反爾尚復誰尤春秋書之所以致亂賊之討垂將來之戒云李氏廉曰宣公即位十年乃不義之君也大畧與桓公同類除即位有年書法同桓公外其餘事同則從同同矣宣公因齊得國終身事齊自黑壤見止之後南通於楚當是時晉之伯事不振故魯亦得以自縱數侵犯小國以自益而晉問不及焉直至十七年斷道之盟始背齊事晉則以季孫之憤也於是歸父逐而三家之張成矣先儒李氏曰賂田求昏君大夫奔走無寧歲以為婚齊

之謀不會于扈不盟于清丘而無事晉之志一逞於兵則伐莒伐邾猶未已也而伐萊伐杞一放於利則取向取緡猶未厭也而取根牟此宣之所以無良圖也斯言得之矣汪氏克寬曰公孫敖如京師不至而復丙戌奔莒則墮君命而廢使事者也歸父如晉還自晉至笙遂奔齊則能達君命而畢使事者也案歸父奔齊高氏閹謂當致命於殯黃氏仲炎汪氏克寬引箴尹克黃以律之其說非也克黃使還之時君尚在也君在則殺之者君也安可逃乎歸父則君已薨矣君薨則殺之者用事之臣也何必輕身以死乎存氏及胡傳皆以

為善之允為定論

欽定春秋傳說彙纂卷二十一

欽定四庫全書

經部

欽定春秋傳說彙纂卷三十三

詳校官監察御史_臣陳化龍

給事中_臣溫常綬覆勘

總校官進士_臣繆琪

校對官中書_臣陳林

謄錄監生_臣王錦

謄錄監生_臣王永年

欽定四庫全書

欽定春秋傳說彙纂卷二十二

成公

集說

范氏甯曰魯世家成公名黑肱宣公之子以周定王十七年即位諡法安民立政曰成

辛定王十年
元年
晉景十年齊頃九年衛穆十年蔡景二年鄭襄十五年曹宣五年陳成九年杞

桓四十七年宋文二十一年
秦桓十五年楚共王審元年

春王正月公即位

二月辛酉葬我君宣公

無冰

胡傳

寒極而無冰者常燠也案洪範傳曰豫恒燠若此政事舒緩紀綱縱弛之象成公幼弱政在三

家公室不張其象已見故當涸陰沍寒而常燠應之古者日在北陸而藏冰獻羔而啓朝之祿位賓食喪

祭冰皆與焉此亦變調愆伏之一事也今既寒而燠遂廢凌人之職然策書所載皆經邦大訓人有微而

不登其姓名事有小而不記其本末雨雹冰雪何以悉書天人一理也萬物一氣也觀於陰陽寒暑之變

以察其消息盈虛此制治於未亂慎於微之意也每慎於微然後王事備矣

集說

杜氏預曰周二月今之十二月而無冰書冬溫啖氏助曰二月今之十二月舉此無冰則一

時無冰可見矣若待終時乃書則今之正月豈可更言無冰乎穀梁之說非也 呂氏大圭曰陽氣之在

天地間譬猶火之著於物也故常有以解之十二月
陽氣蘊伏錮而未發其盛在下則納冰於地中二月
四陽作蟄蟲起陽始用事則亦始啓冰而廟薦之四
月陽氣畢達陰氣將絕則冰於是大發食肉之祿老
病喪浴冰無不及故藏冰發冰所以節陽氣也汪
氏克寬曰七書不雨三書雨雹及無冰再書隕霜亦
三書
雨雪

附錄左傳

春晉侯使瑕嘉平戎於王單襄公如晉拜
成劉康公徵戎將遂伐之叔服曰背盟而

欺大國此必敗背盟不祥欺大國不義神人弗助將
何以勝不聽遂伐茅戎三月癸未敗績於徐吾氏

茅戎杜注戎別種也水經注大陽縣有茅亭故茅
戎邑也括地志茅戎在河北縣西二十里當在今

山西平陽府平陸縣界
徐吾氏杜注茅戎別種

三月作丘甲

左傳

為齊難故
作丘甲

胡傳

作丘甲益兵也古者九夫為井四井為邑四邑為丘四丘為甸甸地方八里旁加一里為成所

取於民者出長轂一乘此司馬法一成之賦也為齊難作丘甲益兵備敵重困農民非為國之道其曰作者不宜作也唐太宗問李靖楚廣與周制如何靖曰周制一乘步卒七十二人甲士三人以二十五人為一甲凡三甲共七十五人然則一丘所出十有八人積四丘而具一乘耳今作丘甲者即丘出一甲是一甸之中共百人為兵矣則未知其所作者三甸而增一乘乎每乘而增一甲乎魯至昭公時嘗蒐於紅革車千乘則計甸而增乘未可知也楚人二廣之法一乘至用百有五十人則魯每乘而增一甲亦未可知

也賦雖不同其實皆為益兵其數皆增三之一耳先儒或言甲非人人之所能為又以為丘出甸賦加四倍者誤矣

集說劉氏敞曰元年作丘甲魯不務廣德而務廣力不務益義而務益兵以王者之制論之則作丘甲之罪大矣王者之制諸侯不得擅賦其民擅稅其民稅為足食也賦為足兵也足食足兵民信之矣然而不得擅者先王之稅既足以食矣先王之賦既足以用矣今不循先王而以意為準必亂之道也是以聖人禁之杜云長轂一乘戎馬四匹牛十二頭甲士三人步卒七十二人此甸所賦而魯今使丘出之予謂丘者十六井爾甸乃六十四井使丘供甸賦是加四倍之歟魯亦必不為也公羊云譏始丘使也非也若如此經自當言丘作甲非作丘甲也穀梁云丘為甲也非也審為使民作甲者春秋何不云井作甲邑

作甲農作甲而必云作丘甲乎 孫氏覺曰是丘出一甲而甸出甲士四人也往者三人而今增其一丘出一人馬 胡氏寧曰成公以前甸賦車一乘每乘七十二人甲士三人凡二十五人為一甲是四丘共出三甲爾今作丘甲即一丘出一甲其於賦增三分之一也 張氏洽曰每甲士統二十四人必無增甲士而不增步卒之理故知李靖所謂二十五人為一甲者其考周制詳矣 家氏鉉翁曰丘甲之說三傳不同公穀謂課丘民自為甲似未得經意杜氏謂古者四丘為甸甸出甲士三人今使一丘出一甸之甲一丘之人豈能出一甸之甲雖求多於民亦未若是之甚也案周禮及司馬法四丘為甸五百七十六夫共出甲士三人步卒七十二人今作丘甲云者每丘出一甲一甸出四甲而古兵制始壞於此矣 萬氏孝恭曰四丘之甸共出甲士三人而成公使一丘出一甲士甲士之數既加則長轂牛馬步卒之賦率加

其四之一聖人惡其紊亂先王軍賦之制故書以譏之
李氏廉曰作例六直云作者三作僖公主作丘
甲作三軍新作三新作南門新延廐新作雉門也然
延廐不書作又曰此條惟胡氏得之蓋司馬法舊制
四丘出三甲三甲為七十五人今四丘出四甲四甲
為百人四丘六十四井五百一十二家也公穀之說
固無足取杜氏則又太過豈有一丘十六井一百
二十八家而使之出一乘之賦哉故胡氏不取

夏臧孫許及晉侯盟于赤棘

注赤棘地

左傳

聞齊將出楚師
夏盟於赤棘

胡傳初宣公謀以晉人去三桓歸父為是見逐而奔
齊矣今季孫當國恨齊人之立宣公納歸父又
懼晉侯之或見討也故往結此盟赤棘晉地也其稱
及魯所欲也盟非春秋所貴而惡屢盟者非惟長亂

亦國用民力所難給也成公即位之初方經大故未
有施舍已責逮鰥寡救乏困之事也為齊難既作丘
甲矣聞將出楚師又遠與晉尋盟豈固本保邦之道
乎書及晉侯盟于赤棘非特備齊懼晉蓋三桓懷忿
懟君父之心將有事於齊而汲汲欲之者罪可見矣

集說

孫氏復曰臧孫許臧孫辰子

胡氏銓曰大夫

後益甚故仲孫何忌及邾子又甚非惟惡大夫之彊
亦惡諸侯之失其御也高氏閔曰許昌為及晉侯
盟齊怨成矣晉援不可緩也故汲汲焉求為此盟
趙氏鵬飛曰魯固齊之與也宣之末年怠於事齊公
孫歸父如晉叛齊也未反而宣公即世歸父奔齊魯
固篤於親晉矣晉蓋疑歸父在齊魯必有二心於齊
而魯亦疑晉之不已信也故為赤棘之盟魯蓋果於
絕齊志於求晉焉明年齊伐我北鄙而四卿會晉師

為韋之戰其謀蓋定於赤棘也家氏鉉翁曰中世以後諸侯之大夫多自結於伯國魯之季氏衛之孫氏宋之華氏皆結於晉者也不特外交其君又以賄結其大夫故君常見疎於伯國臣反挾伯國之援以脅制其君亂亡所從始也故春秋深著人臣外交之戒汪氏克寬曰自公孫敖會晉侯于戚而後季孫行父會齊侯于陽穀公子遂及齊侯盟于鄆丘繼而公孫歸父會齊侯于穀會楚子于宋矣今也臧孫許及晉侯盟于赤棘以大夫盟伯主而不愧也昔也遂盟趙盾今也許盟晉侯益無忌憚矣春秋內大夫特盟外諸侯者五鄆丘赤棘拔句繹皆書及唯禘祥書會夫盟齊盟晉魯之汲汲可知于拔則定公之位未定如晉見卻故修好於邾句繹則二卿取邾田又脅邾子以盟之也故四盟皆魯之志也禘祥外為志猶為彼善於此也

秋王師敗績于茅戎

公穀作
貿戎

左傳

秋王人
來告敗

穀梁

不言戰莫之敵敵也為尊者諱敵不諱敗為親者諱敗不諱敵尊尊親親之義也

集說

杜氏預曰不言戰王者至尊天下莫之得校故以自敗為文不書敗地而書茅戎明為茅戎所

敗書秋從告啖氏助曰公羊曰孰敗之蓋晉敗之或曰貿戎敗之曷為不言晉敗之王者無敵莫敢當

也若晉敗王師而改曰貿戎是掩惡也如何懲勸乎

陸氏淳曰淳聞於師曰王者之師有征無戰今王

與戎為敵此取敗之道非戎所能敗也故以自敗為文所以深譏王也孫氏復曰王者至尊天下莫得

而敵非茅戎可得敗也定王庸暗無宣王之烈王師為茅戎所敗惡之大者故孔子以王師自敗為文所

以存周也 劉氏敞曰此敗績也何以不言戰王者
無敵天下莫敢當也莫敢當其言敗績何天下之勢
大矣非有能敗王之師者也王自敗也 陳氏傳良
曰戰然後言敗績此不戰何以書敗績言自敗也凡
王有事譏不在諸侯諸侯有事譏不在臣子如天王
出居于鄭鄭棄其師皆以自致之文書之雖有敵國
亦自致也 梁亡齊人殲于遂王師敗績于茅戎無敵
國之辭也 家氏鉉翁曰穀梁為尊者諱敵不諱敗
此義正矣但公穀皆以
為晉敗王師則無是也

冬十月

穀梁季孫行父禿晉卻克眇衛孫良夫跛曹公子手
跛者使跛者御跛者使僂者御僂者蕭同姪子處臺
上而笑之聞於客客不說而去相與立胥間而語移

曰不解齊人有知之者
曰齊之患必自此始矣

集說范氏甯曰穀梁子作傳皆釋經以立義未有無
其文而橫發傳者疑冬十月下云季孫行父如

齊脫此
六字

附錄左傳冬臧宣叔令修賦繕完具守備曰齊楚結
好我新與晉盟晉楚爭盟齊師必至雖晉
人伐齊楚必救之是齊楚同
我也知難而有備乃可以逞

壬定王十二年晉景十一年齊頃十年衛穆十一年蔡
申八年二年景三年鄭襄十六年曹宣六年陳成十

年杞桓四十八年宋文二十
二年秦桓十六年楚共二年

春齊侯伐我北鄙

左傳二年春齊侯伐我北鄙圍龍頃公之嬖人廬蒲

入而封弗聽殺而膊諸城上齊侯親鼓士陵城三日取龍遂南侵及巢丘

龍杜注魯邑在泰山博縣西南

胡傳初魯事齊謹甚雖易世而聘會不絕也及與晉

我北鄙齊侯之興是役非義矣魯人為鞏之戰豈義乎同曰憤兵務相報復而彼此皆無善者則亦不待貶而罪自見矣

集說高氏閔曰魯絕齊而與晉盟齊遂即楚而伐我

兵於魯者蓋望魯之或改而事齊也齊頃不義於四鄰諸侯皆咤然外之獨魯宣以援立之故不敢忘惠

公之好而折節事齊蓋亦不情矣末年命歸父如晉其叛齊之跡已顯而齊不察見歸父之來奔猶以為魯之未絕齊也既而成公立臧孫許及晉侯盟于赤棘始知魯決然無齊故有北鄙之伐馬頃公驕傲結憾於諸侯晉衛既以讎齊今又賈怨於魯其召鞏之敗非不幸也蓋自取也家氏鉉翁曰此齊人爭魯於晉也前日魯宣專意事齊晉莫如之何也今魯人去齊而即晉赤棘朝盟齊師暮至書齊侯伐我所謂目其人而貶之也夫既辱晉使又以兵加於魯則其志在於與晉為敵好戰而不度力其頃公之謂矣李氏廉曰自齊懿公之後齊兵不至魯者二十年於是再見

夏四月丙戌衛孫良夫帥師及齊師戰于新築衛師敗

績

新築杜注衛地史記趙成侯及魏惠王遇于葛築或云即新築也今直隸大名府魏縣南二十里有新築

城

左傳衛侯使孫良夫石稷甯相向禽將侵齊與齊師
遇石子欲還孫子曰不可以師伐人過其師而
還將謂君何若知不能則如無出今既遇矣不如戰
也夏有石成子曰師敗矣子不少須衆懼盡子喪師
徒何以復命皆不對又曰子國卿也隕子辱矣子以
衆退我此乃止且告車來甚衆齊師乃止次于鞠居
新築人仲叔于奚救孫桓子桓子是以免既衛人賞
之以邑辭請曲縣繁纓以朝許之仲尼聞之曰惜也
不如多與之邑唯器與名不可以假人君之所司也
名以出信信以守器器以藏禮禮以行義義以生利
利以平民政之大節也若以假人與人
政也政亡則國家從之弗可止也已

鞠居杜注衛地後漢志封
丘有鞠亭即古鞠居也

胡傳

齊師侵虐而以衛主此戰何也衛侯初與晉同盟于斷道矣又使世子臧與晉同伐齊矣又使

孫良夫石稷將侵齊矣及與齊師遇石稷欲還良夫不可曰以師伐人遇其師而還將謂君何若知不能

則如無出今既遇矣不如戰也遂戰于新築故齊師雖侵虐而此戰以衛主之也春秋善解紛貴遠怨而

惡以兵刃相接故書法如此

集說

杜氏預曰四月無丙戌丙戌五月一日劉氏敞曰戰而言及之者主之者也猶曰孫良夫為

志乎為此戰也云爾陳氏傳良曰衛書大夫帥師於是始大夫疆也良夫世為卿至林父出其君入于

戚以叛是故孔達不言帥師必良夫而後言帥師張氏洽曰易曰師左次无咎凡戰而不能勝者聖人

立全師愛民之法所以重民命而存國體也良夫不從石稷之言必進而戰致敗其師幾於喪身辱國此

春秋所以罪良夫而以之主新築之戰也程氏端學曰良夫專兵輕進以取敗辱國害民罪莫大焉衛

侯使之戰以致敗亦罪也齊侯侵虐鄰國雖得勝於一時遂來鞏之敗績亦罪也

案新築之戰說者以為衛伐齊也或又謂新築衛地戰于衛則齊伐衛也考其情事蓋衛與侵齊之師尚在衛之封內而齊既伐魯遂乘勝而伐衛兩軍遇于新築而戰爾良夫喪師辱國故以之主戰而書及

六月癸酉季孫行父臧孫許叔孫僑如公孫嬰齊帥師

會晉卻克衛孫良夫曹公子首及齊侯戰于鞏齊師敗

績卻去逆反首公穀作手鞏音安鞏杜注齊地穀梁曰鞏去齊五百里杜氏通典云鞏在平陰縣東今平

陰去臨淄五百里似與穀梁合矣然以左傳考之自始合以至齊敗止為一日之事華不注在濟南城北

去平陰二百三十里何以一奔而遽至乎近志云鞏即古之歷下似為得之

左傳

如孫桓子還於新築不入遂如晉乞師臧宣叔亦

曰此城濮之賦也有先君之明與先大夫之肅故捷克於先大夫無能為役請八百乘許之卻克將中軍

士燮將上軍欒書將下軍韓厥為司馬以救魯衛臧宣叔逆晉師且道之季文子帥師會之及衛地韓獻

子將斬人卻獻子馳將救之至則既斬之矣卻子使速以徇告其僕曰吾以分謗也師從齊師於莘六月

壬申師至於靡笄之下齊侯使請戰曰子以君師辱於敝邑不腆敝賦詰朝請見對曰晉與魯衛兄弟也

來告曰大國朝夕釋憾於敝邑之地寡君不忍使羣臣請於大國無令與師淹於君地能進不能退君無

所辱命齊侯曰大夫之許寡人之願也若其不許亦將見也齊高固入晉師桀石以投人禽之而乘其車

繫桑本馬以徇齊壘曰欲勇者賈余餘勇癸酉師陳于鞌郕夏御齊侯逢丑父為右晉解張御卻克鄭丘緩為右齊侯曰余姑翦滅此而後朝食不介馬而馳之卻克傷於矢流血及屨未絕鼓音曰余病矣張侯曰自始合而矢貫余手及肘余折以御左輪朱殷豈敢言病吾子忍之緩曰自始合苟有險余必下推車子豈識之然子病矣張侯曰師之耳目在吾旗鼓進退從之此車一人殿之可以集事若之何其以病敗君之大事也擐甲執兵固即死也病未及死吾子勉之左并轡右援枹而鼓馬逸不能止師從之齊師敗績逐之三周華不注韓厥夢子輿謂已曰且辟左右故中御而從齊侯郕夏曰射其御者君子也公曰謂之君子而射之非禮也射其左越於車下射其右斃於車中綦毋張喪車從韓厥曰請寓乘從左右皆肘之使立於後韓厥俛定其右逢丑父與公易位將及華泉駢絀於木而止丑父寢於輶中蛇出於其下以

肱擊之傷而匿之故不能推車而及韓厥執繫馬前
再拜稽首奉觴加璧以進曰寡君使羣臣為魯衛請
曰無令輿師陷入君地下臣不幸屬當戎行無所逃
隱且懼奔辟而忝兩君臣辱戎士敢告不敏攝官承
乏丑父使公下如華泉取飲鄭周父御佐車宛蔑為
右載齊侯以免韓厥獻丑父卻獻子將戮之呼曰自
今無有代其君任患者有一於此將為戮乎卻子曰
人不難以死免其君我戮之不祥赦之以勸事君者
乃免之齊侯免求丑父三入三出每出齊師以帥退
入於狄卒狄卒皆抽戈插冒之以入於衛師衛師免
之遂自徐闢入齊侯見保者曰勉之齊師敗矣辟女
子女子曰君免乎曰免矣曰銳司徒免乎曰免矣曰
苟君與吾父免矣可若何乃奔齊侯以為有禮既而
問之辟司徒之妻也予之石窀晉師從齊師入自丘
輿擊馬陘齊侯使賓媚人賂以紀甌玉磬與地不可
則聽客之所為賓媚人致賂晉人不可曰必以蕭同

叔子為質而使齊之封內盡東其畝對曰蕭同叔子非他寡君之母也若以匹敵則亦晉君之母也吾子布大命於諸侯而曰必質其母以為信其若王命何且是以不孝令也詩曰孝子不匱永錫爾類若以不孝令於諸侯其無乃非德類也乎先王疆理天下物土之宜而布其利故詩曰我疆我理南東其畝今吾子疆理諸侯而曰盡東其畝而已唯吾子戎車是利無顧土宜其無乃非先王之命也乎反先王則不義何以為盟主其晉實有闕四王之王也樹德而濟同欲焉五伯之霸也勤而撫之以役王命今吾子求合諸侯以逞無疆之欲詩曰布政優優百禄是道子實不優而棄百禄諸侯何害焉不然寡君之命使臣則有辭矣曰子以君師辱於敝邑不腆敝賦以犒從者畏君之震師徒撓敗吾子惠徼齊國之福不泯其社稷使繼舊好惟是先君之敝器土地不敢愛子又不許請收合餘燼背城借一敝邑之幸亦云從也況其

不幸敢不惟命是聽魯衛諫曰齊疾我矣其死亡者皆親暱也子若不許驪我必甚唯子則又何求子得其國實我亦得地而紆於難其榮多矣齊晉亦唯天所授豈必晉晉人許之對曰羣臣帥賦輿以為魯衛請若苟有以藉口而復於寡君君之惠也敢不唯命是聽禽鄭自師逆公

莘杜注齊地 靡笄杜注山名 歷史記晉平公元年伐齊戰于靡下 徐廣曰靡當作歷 志曰歷山即左

傳所謂靡笄之山也 今名千佛山 在山東濟南府南十里 華不注杜注山名 伏琛云不音跗 與詩

鄂不韡韡之不同 謂花蒂也 言此山孤秀如華 跗之著於水也 今在山東濟南府城北 華泉京相

璠曰華不注山下泉水也 徐開今淄川縣有古徐關 石窰杜注邑名 濟北盧縣東有地名石窰

隋初為盧縣之長清鎮 尋置長清縣 今仍之 古城在縣東南三十里 丘與杜注齊邑當在益都縣

界馬陘杜注齊邑
在今益都縣西南

胡傳大國三軍次國二軍魯雖大國而四卿竝將是
四軍也當此時舊制猶存尺地皆公室之土也
一民皆公室之兵也上卿行父與僑如嬰齊各帥一
軍會戰而臧孫許如晉乞師又逆晉師為之道本不
將兵特往來晉魯兩軍之間預謀議耳成公初立主
幼國危為季孫一怒埽境內興師而四卿竝出肆其
憤欲雖無人乎成公之側有不恤也然後政自季氏
出矣將稱元帥略其副屬辭之體也而四卿皆書者
豈特為詳內錄哉堅冰之戒亦明矣經之大例受伐
者為主而此以四國及之者以一笑之微殘民毒衆
幾獲其君而怒猶未怠焚雍門之茨侵車東至海故
以四國主之為憤兵之大戒見諸行事深切著明矣
集說董氏仲舒曰頃公齊桓之孫伯主之餘業即位
九年未嘗一與會同之事有怒魯衛之志伐魯

入其北郊伐衛敗之新築大國往聘慢而不敬晉魯俱怒合四國之衆大困之於鞏大辱身幾亡國為天下笑趙氏匡曰公羊云曹無大夫書公子手憂內也穀梁云以吾四大夫在焉舉其責也此尤鄙近春秋豈黨內而專輕重於外乎劉氏敞曰公羊曰曹無大夫公子手何以書憂內也非也春秋不王魯吾既言之矣且曹何以獨無大夫乎若曹以小國故無大夫鄭亦伯也亦無大夫乎且春秋之正諸侯也以王爵不以土地廣狹也曹鄭同儕一有大夫一無大夫何哉陳氏傅良曰凡帥非卿不書雖卿也非元帥亦不書書魯四卿是各自帥也自文季年而無使介至是而無將佐魯三家之勢成矣於是衛書良夫曹書公子首而賞鞏之功晉於是六卿征伐在大夫不獨魯也以四國之臣戰齊君甚矣張氏洽曰兵法爭恨小故不忍忿怒者謂之忿兵今晉為盟主興師討齊非有救亂誅暴之名而起於卻克一怒之

憤故春秋不以齊為主見晉魯衛曹之大夫為志乎
是戰雖得一朝之勝不足道也趙氏鵬飛曰鞏之
戰以四國之七大夫而敵一齊侯雖頃公橫逆有以
召天下之兵而大夫之專恣亦甚矣驕傲不悛以犯
諸侯之怒者齊也威柄下移而啓大夫之橫者四國
也齊侯不義而四國之君不智春秋蓋同一貶焉
家氏鉉翁曰魯諸卿俱帥師又見昭十年伐莒哀二
年伐邾三家專兵丘甸卒乘悉為所有其君孤立於
上國益不可為而春秋終矣戰鞏乃魯卿擅兵之始
也又曰凡內大夫帥師惟主帥得書今四卿並書見
羣下知有李孫不知有公室三家自是愈專而公室
微矣李氏廉曰春秋列書將佐始此自此以後昭
十年伐莒書三卿哀二年伐邾書三卿成六年侵宋
書二卿定八年侵衛書二卿汪氏克寬曰齊桓伐
衛與衛人戰則先書伐而後書戰此不書四國伐齊
者以卻克志在釋己私忿非能聲齊頃陵弱犯寡之

罪而討之也然齊自翟泉以來不與晉之會盟者踰
四十年而袁婁以後迨於悼公之終歷三十餘載無
會之不同無役之不與則亦以鞏之敗衄有以挫其
氣而摧其彊故耳晉氏世伯合諸侯以加兵於齊者
三鞏之戰雖能勝齊然恃力而不能服之以義惟平
陰之役合十有二國之君以討其暴橫憑陵之惡故
春秋書同圍齊以予之至于夷儀之會雖曰討之以
義而徇於利不能成討齊之功故春秋書同盟重丘
以貶之也王氏錫爵曰齊之君臣恃勇輕敵而不
免於敗晉之將佐忍傷致死而卒能勝之所謂兩敵
相當貴於忍也

案四國戰齊於鞏諸大夫興大眾以雪一笑之恥故
說者多以為忿兵然是時楚氛孔熾齊以東方之大
國亦與楚通矣晉將復修伯業若不得齊則魯衛曹
邾皆有依違觀望之意故盟于斷道謀楚即以謀齊

及爰婁既盟而齊不肯晉者二十餘年楚亦少歛其鋒晉人世伯之緒賴以不墜則鞏之戰亦安可少哉

秋七月齊侯使國佐如師已酉及國佐盟于袁婁穀作爰婁

袁婁張氏洽曰臨淄縣西有袁婁或曰在淄川境

左傳秋七月晉師及齊國佐盟于袁婁使齊人歸我汶陽之田

公羊

師還齊侯晉卻克投戟逡巡再拜稽首馬前逢丑父者頃公之車右也面目與頃公相似衣服

與頃公相似代頃公當左使頃公取飲頃公操飲而至曰革取清者頃公用是佚而不反逢丑父曰吾賴社稷之神靈吾君已免矣卻克曰欺三軍者其法奈何曰法斲於是斲逢丑父已酉及齊國佐盟于袁婁曷為不盟於師而盟于袁婁前此者晉卻克與臧孫許同時而聘於齊蕭同姪子者齊君之母也踊於梧

而闕客則客或跛或眇於是使跛者迂跛者使眇者迂眇者二大夫出相與踦閭而語移日然後相去齊人皆曰患之起必自此始二大夫歸相與率師為宰之戰齊師大敗齊侯使國佐如師卻克曰與我紀侯之顛反魯衛之侵地請諾使耕者東畝是則土齊也蕭同姪子者齊君之母也齊君之母猶晉君之母也不可請戰壹戰不勝請再再戰不勝請三三戰不勝則齊國盡子之有也何必以蕭同姪子為質揖而去之卻克眊魯衛之使使以其辭而為之請然後許之逮于袁婁而與之盟然

穀梁韋去國五百里爰婁去國五十里一戰縣地五百里焚雍門之茨侵車東至海君子聞之曰夫甚甚之辭焉齊有以取之也齊之有以取之何也敗衛師于新築侵我北鄙教卻獻子齊有以取之也爰

婁在師之外卻克曰反魯衛之侵地以紀侯之廟來以蕭同姪子之母為質使耕者皆東其畝然後與子盟國佐曰反魯衛之侵地以紀侯之廟來則諾以蕭同姪子之母為質則是齊侯之母也齊侯之母猶晉君之母也晉君之母猶齊侯之母也使耕者盡東其畝則是終土齊也不可請一戰一戰不克請再再不克請三三不克請四四不克請五五不克舉國而授於是而與之盟

雍門齊記古齊城周五十里有十三門其西曰雍門

胡傳齊國佐如師與楚屈完來一也然陘之役則曰來盟于師盟于召陵牽之戰則曰及國佐盟于袁婁何也荆楚暴橫憑陵諸夏齊桓公仗義聲罪致討威行江漢之上不待加兵而楚人帖服其書來盟于師者楚人自服而求盟也盟于召陵者桓公退舍禮與之盟也在春秋時斯為善矣若夫袁婁則異於

是齊雖侵虐未若荆楚之暴也諸國大夫含憤積怒欲雪一笑之恥至於殺人盈野非有擊彊扶弱之心國佐如師將以賂免非服之也晉大夫又不以德命使齊人盡東其畝而以蕭同叔子為質夫蕭同叔子齊君之母也則亦悖矣由是國子不可請合餘燼背城借一揖而去之卻克使魯衛之使以其辭為之請逮于袁婁而與之盟則沒沒欲盟者晉也故反以晉人及之若此類見曲直之繩墨矣是故制敵莫如仗義天下莫大於理而彊有力不與焉亦可謂深切著明矣

集說 劉氏敞曰齊侯使國佐如師公羊曰君不行使乎大夫此其行使乎大夫何佚獲也非也君不行使乎大夫者謂安平無事耳今兩國治戎將在軍君命有所不受苟君命有所不受其重且專也可知矣行使何傷又諸侯會晉師於棐林實趙盾之師言晉師者君不會大夫也君不會大夫故可言晉師不

可言趙盾今此亦言晉師足矣乃其常文何以為不
行使大夫乎高氏閔曰國佐受成命於君而可否
在晉之大夫非服晉而往也直畏晉彊賂晉而請盟
爾故不曰來盟而曰齊侯使如師師在齊境故書如
陳氏傳良曰屈完不言使而退盟之於召陵以禮
於楚使國佐言使而進盟之于袁婁以偏齊君桓公
之所不敢而四國之臣敢為之甚矣鞏戰之怠也
張氏洽曰卻克挾主盟之勢以行其私憤一旦戰勝
而以不義求多於齊反為國佐以理折之其氣遂餒
書曰齊侯使國佐如師言齊非有誠服之心也曰及
國佐盟于袁婁言汲汲在晉齊不得已而盟也家
氏鉉翁曰召陵之師諸侯皆在兵力甚彊而桓公乃
能以不戰服楚退師而禮與之盟鞏之戰卻克既敗
齊師極其兵力之所至迨於袁婁去國都五十里進
師將及其城而彊與之盟退而盟盟之以其禮也進
而盟盟之以其力也春秋書來盟及盟一字褒貶深

切著明矣。吳氏澂曰：齊師既敗于鞏，使國佐來納賂以求成。故書如師，晉之義既不足以服齊之心，故國佐徑去。四國進師追及國佐，近偪齊都而與盟。袁婁此晉之無義，又無禮也。程氏端學曰：齊侯自恃其彊，以伐人及其窮蹙，則使重臣求免。四國大夫專兵，雪忿偶得一勝，則逞無窮之欲。二者皆足為永鑒矣。李氏廉曰：此條三傳略同。公羊序事與穀梁相出入，但以使齊為臧孫許及郤克斲丑父等小不合。又左氏作蕭同叔子，以為同叔蕭君之字。其子齊君之母也。此說得之。公羊作蕭同姪子，以蕭同為國名。姪子者，蕭同君姪弟之子。嫁於齊生頃公，穀梁作蕭同姪子之母，以為蕭國也。同姓也。姪子字也。其母更嫁齊惠公，生頃公。楚人滅蕭，隨母在齊。其說無據。汪氏克寬曰：齊桓末年，公孫敖帥師及諸侯之大夫救徐，征伐自大夫出矣。而未嘗盟會也。晉文末年，翟泉之盟，以諸侯之大夫上盟。王子虎禮樂自大夫出。

矣而非征伐也今此魯以四卿帥師會伯國之上卿與衛曹之卿大夫敗齊侯于鞏又盟齊國佐于袁婁而禮樂征伐皆自大夫出矣厥後晉悼以復伯之賢首以諸侯之大夫圍彭城城虎牢盟陳袁僑征伐盟會悉付之大夫而蕭魚之後凡役皆以大夫矣翟泉之大夫貶稱人此不勝貶則從同也

附錄左傳公會晉師于上鄆賜三帥先路三命之服司馬司空輿師候正亞旅皆受一命之服

上鄆杜注地闕當在陽穀縣境蓋齊衛境上之邑也

八月壬午宋公鮑卒

左傳八月宋文公卒始厚葬用蜃炭益車馬始用殉重器備槨有四阿棺有翰檜君子謂華元樂舉

於是乎不臣臣治煩去惑者也其惑死又益其侈是以伏死而爭今二子者君生則縱其惑死又益其侈是棄君於惡也何

臣之為

庚寅衛侯速卒

速公作邀

左傳

九月衛穆公卒晉三子自役弔焉哭於大門之外衛人逆之婦人哭於門內送亦如之遂常以

葬

附錄左傳

楚之討陳夏氏也莊王欲納夏姬申公巫臣曰不可君召諸侯以討罪也今納夏姬

貪其色也

貪色為淫淫為大罰周書曰明德慎罰文王所以造周也明德務崇之謂也慎罰務去之

謂也

若興諸侯以取大罰非慎之也君其圖之王乃止子反欲取之巫臣曰是不祥人也是天子蠻殺御

叔弒靈侯戮夏南出孔儀喪陳國何不祥如是人生

實難其有不獲死乎天下多美婦人何必是子反乃

止王以予連尹襄老襄老死於邲不獲其尸其子黑
要烝焉巫臣使道焉曰歸吾聘女又使自鄭召之曰
尸可得也必來逆之姬以告王王問諸屈巫對曰其
信知營之父成公之嬖也而中行伯之季弟也新佐
中軍而善鄭皇成甚愛此子其必因鄭而歸王子與
襄老之尸以求之鄭人懼於邲之役而欲求媚於晉
其必計之王遣夏姬歸將行謂送者曰不得尸吾不
反矣巫臣聘諸鄭鄭伯許之及共王即位將為陽橋
之役使屈巫聘於齊且告師期巫臣盡室以行申叔
跪從其父將適郢遇之曰異哉夫子有三軍之懼而
又有桑中之喜宜將竊妻以逃者也及鄭使介反幣
而以夏姬行將奔齊齊師新敗曰吾不處不勝之國
遂奔晉而因卻至以臣於晉晉人使為邢大夫子反
請以重幣錮之王曰止其自為謀也則過矣其為吾
先君謀也則忠忠社稷之固也所蓋多矣且彼若能
利國家雖重幣晉將可乎若無益於晉晉將棄之何

勞錮焉 晉師歸范文子後入武子曰無為吾望爾也乎對曰師有功國人喜以逆之先入必屬耳目焉是代帥受名也故不敢武子曰吾知免矣卻伯見公曰子之力也夫對曰君之訓也二三子之力也臣何力之有焉范叔見勞之如卻伯對曰庚所命也克之制也變何力之有焉欒伯見公亦如之對曰變之詔也士用命也書何力之有焉

陽橋杜注魯地陸澄曰博縣有陽橋今在泰安州西北

取汶陽田

汶音問

公羊

汶陽田者何
章之賂也

胡傳

汶陽之田本魯田也取者得非其有之稱不曰復而謂之取何也恃大國兵力一戰勝齊得其

故壤而不請於天王以正疆理則取之不以其道與
得非其有奚異乎然則宜奈何考於建邦土地之圖
若在封域之中則先王所錫先祖所受經界世守不
可亂矣不然侵小得之春秋固固有興滅國繼絕世之
義必有處也魯在戰國時地方五百里而孟氏語慎
子曰如有王者作在所損乎在所益乎經於復其故
田而書取所
損益可知矣

集說

杜氏預曰

晉使齊還魯故書取不以好得故不

防取訾婁外歸魯地皆曰歸如濟西龜陰及護闡汶
陽田魯地也齊人以歸於我當曰歸今而曰取者蓋
因晉力而取之也歸者其意也取者我也非其志也
於後齊復事晉故八年使韓穿來言歸之於齊然此
年齊歸我田書曰取八年齊取我田乃曰歸者取之
自晉歸之自晉以見魯國之命制於晉而已故雖我

田也而不得偃然有之其猶寄爾故齊歸我田書曰
 取猶若取之於外者齊取我田書曰歸猶若齊之所
 有也孫氏復曰汶陽之田魯地也齊人侵之今魯
 從晉故復取之不言取之齊者明本非齊地家氏
 鉉翁曰取汶陽田與取濟西田其事同故書法不異
 蓋濟西本魯田為曹所侵晉人取以歸魯汶陽亦魯
 田為齊所侵晉人命以歸魯皆魯侵疆也今而得之
 春秋不以為歸而以為取為其因伯國之力而得之
 也伯國復不稟命於王分正疆理而擅其予奪所以
 書取若此田非魯之舊疆必繫之於齊不直書取汶
 陽田矣李氏廉曰汶陽田侵於齊久矣一反於曹
 沫之盟再復於鞏之戰又失於韓穿之來言直至孔
 子為政然後有鄆譙龜陰之歸鄆譙龜陰左氏亦曰
 汶陽之田也汪氏克寬曰僖元年公賜季友汶陽
 之田又曰趙氏云凡力得之曰取齊歸汶陽而稱取
 言藉晉之力以復之而得之之難也穀梁云歸易辭

也齊取汶陽而稱歸言奉晉之命以反之而失之易也

冬楚師鄭師侵衛

集說高氏閔曰鄭從楚而首伐衛喪是授戈與寇而攻其親戚罪不勝誅矣列鄭於下所以深罪鄭也趙氏鵬飛曰機會之失為損大矣楚鄭侵衛晉失機也晉自文襄以降世嗣霸統成公靈公庸懦無立猶時出而主諸侯景公之興適當楚莊之方張無以施其一二宣十八年楚子旅卒共王即位未能和諸侯晉不能於是時修文襄之業號召諸侯以抗楚乃區區修一朝之忿而助魯衛以逞憾於齊則楚鄭侵衛晉致之也既而楚勢益張魯人戰恐公及楚大夫為蜀之會卒之天下諸侯自河以東一舉而屬楚是雖魯成之罪而晉之責為重也

十有一月公會楚公子嬰齊于蜀

楚書公子自嬰齊始

左傳

宣公使求好於楚莊王卒宣公薨不克作好公即位受盟於晉會晉伐齊衛人不行使於楚而

亦受盟於晉從於伐齊故楚令尹子重為陽橋之役以救齊將起師子重曰君弱羣臣不如先大夫師衆而後可詩曰濟濟多士文王以寧夫文王猶用衆况吾儕乎且先君莊王屬之曰無德以及遠方莫如惠恤其民而善用之乃大戶已責逮鰥救乏赦罪悉師王卒盡行彭名御戎蔡景公為左許靈公為右二君弱皆彊冠之冬楚師侵衛遂侵我師於蜀使臧孫往辭曰楚遠而久固將退矣無功而受名臣不敢楚侵及陽橋孟孫請往賂之以執斲執鉞織絰皆百人公衡為質以請盟楚人許平

胡傳

案左氏魯衛受盟於晉從於伐齊故楚為陽橋之役令尹子重曰師衆而後可於是王卒盡行

二國稱師著其衆也侵衛則書侵我師于蜀致賂納質沒而不書非諱也書其重者則莫重乎降班失列下與楚大夫會也李孫行父為國上卿當使其君尊榮其民免於侵陵之患而危辱至此特起於忿枝肆其褊心而不知制之以禮也

集說

啖氏助曰穀梁曰楚無大夫其曰公子何也嬰齊亢也傳以處父不書族為亢今以書族為亢

何自矛盾也

陳氏傳良曰凡吾君會諸侯則有大夫得稱其大夫故洮書莒慶向書衛甯速苟無諸侯

則不以大夫敵吾君故莒無大夫則曰莒人齊有大夫則曰齊大夫及高侯盟及處父盟始以大夫敵吾

君矣皆不書公以是為齊晉之譏則諱公焉耳此其曰公會楚公子嬰齊是公自與嬰齊夷也於楚之會孟公後諸侯至於楚之圍宋公亦後諸侯至魯猶重從楚也公與嬰齊夷楚何譏焉不足為公諱焉爾是

故自屈完以來楚大夫無氏族也而書公子自嬰齊始家氏鉉翁曰自楚僭王其公子亦僭而稱王子久矣今書楚公子春秋革之也吳氏澂曰楚用子重之謀以救齊為名加兵於魯衛魯納賂請平又約諸國會盟公先往會嬰齊不沒嬰齊之氏名者欲見其挾衆威魯而以臣伉君也李氏廉曰公特會外大夫止此李氏本曰成公以周公之裔諸侯之望下與楚大夫會辱已甚矣何以善其後哉

丙申公及楚人秦人宋人陳人衛人鄭人齊人曹人邾人薛人鄆人盟于蜀

左傳

十一月公及楚公子嬰齊蔡侯許男秦右大夫說宋華元陳公孫寧衛孫良夫鄭公子去疾及

齊國之大夫盟于蜀卿不書匱盟也於是乎畏晉而竊與楚盟故曰匱盟蔡侯許男不書乘楚車也謂之

失位君子曰位其不可不慎也乎蔡許之君一失其位不得列於諸侯况其下乎詩曰不解于位民之攸暨其是之謂矣

胡傳

盟而魯與必先書公尊內也次書主盟者衆所推也此書公及楚人則知主盟者楚也公子嬰

齊秦右說宋華元陳公孫寧衛孫良夫鄭去疾皆國卿也何以稱人楚僭稱王春秋黜之晉雖不競猶主夏盟諸侯苟能任仁賢修政事保固疆圉要結鄰好同心擇義堅事晉室荆楚雖大何畏焉今乃西向服從而與盟不亦恥乎

集說

陸氏淳曰趙氏云公與外大夫盟例不書公而此書之譏公棄晉從楚也又曰淳聞於師曰外

大夫悉書人言公自屈禮與之盟非大夫之罪也李氏堯俞曰前此楚與諸國盟皆序諸國之下此序

諸國之上欲見楚之主盟也。劉氏敞曰：公羊云：其稱人何？得一貶焉。云爾，吾不識得貶云者，竟何事也？穀梁曰：會與盟同，月則地，會不地，盟不同，月則地，會地，盟此其地，會地，盟何也？以公之得其所申其事也。非也會時一國，盟時十一國，十一月公會，楚公子嬰齊于蜀，丙申，公及楚人、秦人、宋人、陳人、衛人、鄭人、齊人、曹人、邾人、薛人、繒人盟于蜀。此乃兩會也。各自書地，乃其理矣。何申之有？程子曰：楚為彊盛，陵轢諸侯，諸侯苟能保固疆圉，要結鄰好，豈有不能自存之理？乃懼而服從與之盟約，故皆稱人以見其衰弱，責諸侯則魯可知矣。陳氏傅良曰：曷為貶稱人？楚大夫初會盟，也是故諸侯之大夫復不序。晉大夫初會盟，則不言公。楚大夫初會，則其言公何？公固與嬰齊夷矣，無足諱焉。爾家氏鉉翁曰：晉伐齊，敗之，鞏盟之，袁婁齊遂與楚合導之，以來晉人坐視莫之如何。吳氏澂曰：嬰齊於此盟降稱人，而前會稱氏名者。

欲見楚人即公子嬰齊也蔡許之君不書者以其為
楚之車左車右降在臣列同於楚臣李氏廉曰列
人諸國之大夫者惟翟泉澶淵及此三役翟泉諱公
不書澶淵沒魯大夫不書惟此書公又曰合此一年
之事觀之晉蓋竭力以事齊故無力以制楚勝齊之
得小而縱楚之害大矣又曰楚專主諸侯之盟莫盛
於此以楚成之彊所得者陳蔡鄭許四國而已而宋
之盟止書諸侯商臣之暴所得者陳蔡鄭宋四國而
已而厥貉之次止書蔡雖以莊王之盛而辰陵之盟
亦不過陳蔡二國從之今蜀之盟諸侯從之者十一
國晉不敢爭其後四十二年然後晉楚之從交相見
又八年楚靈求諸侯於晉皆蜀之役啓之也春秋安
得不重貶之哉一會一盟前不書嬰齊之名氏無以
見楚之彊後不貶諸國無以見諸國之弱惟貶諸國
之卿不得不貶楚貶楚及諸國則不諱公可也胡氏
陳氏說得之穀梁以為前書嬰齊者嬰齊之伉後書

楚人者嬰齊能自降以從盟故春秋於會蜀不諱公疑其說之誤矣

案楚秦列諸國之上蓋以彊大相先也舊史從赴告之文聖人亦因而書之耳蔡許不書則左氏得之

附錄左傳

楚師及宋公衡逃歸臧宣叔曰衡父不忍數年之不宴以棄魯國國將若之何誰居

後之人必有任是夫國素矣是行也晉辟楚畏其衆也君子曰衆之不可已也大夫為政猶以衆克况明

君而善用其衆乎大誓所謂商兆民離周十人同者衆也晉侯使鞏朔獻齊捷於周王弗見使單襄公

辭焉曰蠻夷戎狄不式王命淫湎毀常王命伐之則有獻捷王親受而勞之所以懲不敬勸有功也兄弟

甥舅侵敗王略王命伐之告事而已不獻其功所以敬親暱禁淫慝也今叔父克遂有功於齊而不使命

卿鎮撫王室所使來撫余一人而鞏伯實來未有職司於王室又奸先王之禮余雖欲於鞏伯其敢廢舊

典以忝叔父夫齊甥舅之國也而大師之後也寧不
亦淫從其欲以怒叔父抑豈不可諫誨士莊伯不能
對王使委於三吏禮之如侯伯克敵使大夫告慶之
禮降於卿禮一等王以鞏伯宴而私賄之使相告之
曰非禮也勿籍

癸定王十
酉九年

三年

晉景十二年齊頃十一年衛定公臧元
年蔡景四年鄭襄十七年曹宣七年陳

成十一年杞桓四十九年宋共公
固元年秦桓十七年楚共三年

春王正月公會晉侯宋公衛侯曹伯伐鄭

左傳

三年春諸侯伐鄭次於伯牛討邲之役也遂東
侵鄭鄭公子偃帥師禦之使東鄙覆諸鄭敗諸

丘輿皇戌
如楚獻捷

伯牛杜注鄭地
鄭地丘與杜注鄭地
鄭杜注

胡傳

案左氏諸侯伐鄭討邲之役也遂東侵鄭公子偃帥師禦之覆諸鄭敗諸丘與夫討邲之役則

復怨勦民非觀釁也遂東侵則潛師掠境非以律也覆而敗諸則專用詐謀非正勝也度彼參此皆無善也略而不紀勝負微也晉侯稱爵而以伐書何也初為是役必以鄭之從楚也則盟主有辭於伐耳宋衛未葬曷為稱爵背殯越境以吉禮從金革之事也

集說

杜氏預曰宋衛未葬而稱爵以接鄰國非禮也高氏閔曰去冬之役鄭為楚導而宋魯衛曹

雖盟于蜀猶不敢背晉故罷盟而遂會晉伐鄭焉鄭罪當討故春秋正諸國之爵以示義鄭敗晉游兵於丘與使皇戌如楚獻捷終鄭襄公之身不復從晉矣家氏鉉翁曰魯宋衛曹去彊盛之楚而從衰弱之

晉以伐有罪之國是春秋之所嘉也四國書爵序晉為首存晉伯也李氏廉曰此邲之後晉再伐鄭而不服也汪氏克寬曰左傳云鄭皇戌如楚獻捷則曰覆曰敗皆指鄭而言非諸侯之敗鄭也經書伐而不書敗所以尊諸侯也

辛亥葬衛穆公

穆公作繆

集說

高氏閔曰此見衛侯背殯出師不臨先君之喪王氏葆曰六月乃葬非禮也

二月公至自伐鄭

集說

吳氏澂曰雖未逾時伐鄭無功亦危之而致也

甲子新宮災三日哭

公羊

新宮者何宣公之宮也宣宮則曷為謂之新宮不忍言也其言三日哭何廟災三日哭禮也新

宮災何以書記災也

穀梁

新宮者禰宮也三日哭哀也其哀禮也迫近不敢稱諡恭也其辭恭且哀以成公為無譏矣

集說

杜氏預曰三年喪畢宣公神主新入廟故謂之新宮書三日哭善得禮宗廟親之神靈所馮居

而遇災故哀而哭之

高氏閔曰君子於是乎知有天道也宣公弑君篡立生不能誅死方立廟遽遇火

災春秋志此示有天道

家氏鉉翁曰公羊以廟災三日哭為禮穀梁以成公為無譏常山劉氏以主未

遷入不當哭書哭所以譏愚竊以公穀之義為正也三年之喪通喪也二十七月而終宣公薨至是二十

八月則主已入廟此入廟之始也主方入廟而廟災此人情之戚成公三日哭可謂知所哀而哀也焚先

人之廬猶三日哭今主始入廟而廟為火所燬人子之痛切為甚三日哭而謂之不合於禮失春秋所以書之旨李氏廉曰此條諸傳皆以為得禮惟胡氏不合

乙亥葬宋文公

胡傳案左氏文公卒始厚葬益車馬重器備君子謂華元樂舉於是乎不臣考於經未有以驗其厚也數其葬之月則信然矣天子七月諸侯五月大夫三月士踰月以降殺遲速為禮之節不可亂也文公之卒國家安靖外無危難曷為越禮踰時逮乎七月而後克襄事哉故知華元樂舉之棄君於惡而益其侈無疑矣夫禮之厚薄稱人情而為之者也宋公在殯而離次出境從金革之事哀戚之情忘矣顧欲厚葬其君親此非有所不忍於死者特欲誇耀淫侈無知之人耳世衰道微禮法既壞無以制其侈心至於

秦漢之間窮竭民力以事丘隴其禍有不可勝言者
春秋據事直書而其失自見此類是也豈不為永戒
哉

集說 高氏閼曰七月而葬天子之
禮也以葬月考之知其僭禮

夏公如晉

左傳 夏公如晉拜
汶陽之田

集說 張氏洽曰汶陽之田特書曰取足以見疆場之
令不出於王矣今為取田而往拜賜於伯國晉
偃然受之而八年復使韓穿來言汶陽之田歸之於
齊足見私情之納侮於晉也 趙氏鵬飛曰古者諸
侯繼世喪葬畢則以士服見於王王賜之韞冕然後
朝鄰國以繼好結信禮之經也今成公釋禪不朝王

而朝晉此何禮邪春秋諸侯以彊弱為判何有於禮
宣公受位於齊故喪畢則朝齊而不朝晉成公受制
於晉故喪畢則朝晉而不朝齊則夫相朝之禮顧所
畏者先之匹敵以下有所不朝而况周室之微哉彼
其狎諸侯而不復朝君子在所不責聖人書朝晉之
事凡以責其偃然無王也 家氏鉉翁曰魯宣謫齊
未除喪而會既除喪而朝成公事晉率宣公之舊除
喪入見之禮不用之王而施之晉春秋所以譏也
李氏廉曰成公朝晉者四年十年四年十年不見
敬十年見止張氏所謂納侮者信矣惟十八年悼公
即位之朝無譏焉 汪氏克寬曰僖公取濟西田而
使公子遂如晉拜賜已非正矣况以成公取汶陽而
躬朝於晉乎濟西汶陽魯之故田也以為
伯國之私惠而聘之朝之見魯之不振也

鄭公子去疾帥師伐許

左傳

許恃楚而不事
鄭鄭子良伐許

集說

高氏開曰疲命於晉楚而以伐之君子以是惡
鄭也陳氏傳良曰鄭初書大夫將也張氏

洽曰晉方怒鄭之不服其為國憂未有底止也乃怒
許之不事已而使大夫動大衆以伐之見其與兵之

不度德量力也以職方考之許近於楚楚越許而後至
以開楚寇也以趙氏鵬飛曰鄭之伐許自撤藩蔽

鄭許弱不能抗楚折而從之君子不責恤其弱也鄭
以許為蔽而北事晉連諸侯以抗荆楚楚亦未遽得

鄭也今鄭折而從楚又連年伐許扼許之小而肆其
毒許鄭唇齒也許亡則鄭亡曷釋許以為外扞固鄭

之利也乃區區逼許不已其後許畏鄭益甚遷入楚
地遷于葉又遷于白羽又遷于容城逼近楚都所以

倚楚而抗鄭鄭既失許故楚兵一出則直履鄭郊楚
患益近故襄公之後鄭多入楚歲有晉楚之兵腹背

受敵水火交熾而鄭特如在鼎之魚耳其患皆起於
伐許而自撤藩扞之故不可不察也故聖人於鄭伐
許之事始終詳之所以誅鄭
之無謀而隲內固之勢也

公至自晉

胡傳宣公薨至是三年之喪畢矣宜入朝京師見天
子受王命然後歸而即政可也嗣守社稷之重
而不朝於周以拜汶陽田之故而往朝
於晉其行事亦悖矣此春秋所為作也

集說家氏鉉翁曰諸侯既除喪而入見於王受敵冕
之賜然後成其為君自東遷此禮廢然亦未有
除喪而入見大國以事王之禮而事大國者也宣公
挾彊齊之援弑君篡國凡可以諂齊而求悅者無不
為矣未除喪而會既除喪而朝今成公借援於晉率
循先公之舊其無王之罪大矣書如書至所以譏也

汪氏克寬曰成公一經此年如晉明年再如晉十年又如晉十八年又如晉過於事天子之禮蓋當時諸侯知有伯者而不知有王不以爲異耳春秋莫不書至比事以觀義自著矣

附錄左傳

晉人歸楚公子穀臣與連尹襄老之尸於楚以求知罃於是荀首佐中軍矣故楚人

許之王送知罃曰子其怨我乎對曰二國治戎臣不才不勝其任以爲俘馘執事不以釁鼓使歸即戮君之惠也臣實不才又誰敢怨王曰然則德我乎對曰二國圖其社稷而求紓其民各懲其忿以相宥也兩釋纍囚以成其好二國有好臣不與及其誰敢德王曰子歸何以報我對曰臣不任受怨君亦不任受德無怨無德不知所報王曰雖然必告不穀對曰以君之靈纍臣得歸骨於晉寡君之以爲戮死且不朽若從君之惠而免之以賜君之外臣首首其請於寡君而以戮於宗亦死且不朽若不得命而使嗣宗職次

及於事而帥偏師以修封疆雖遇執事其弗敢違其
竭力致死無有二心以盡臣禮所以報也王曰晉未
可與爭重為之禮而歸之

秋叔孫僑如帥師圍棘

棘杜注汶陽田之邑在濟北蛇丘縣劉昭曰蛇丘縣有棘鄉季

氏私考曰今當為肥鄉縣地

左傳

秋叔孫僑如圍棘取汶陽之田棘不服故圍之

公羊

棘者何汶陽之不服邑也其言圍之何不聽也

胡傳

案左氏取汶陽之田棘不服故圍之復故地而民不聽至於命上將用大師環其邑而攻之何

也魯於是時初稅畝作丘甲稅役日益重矣棘雖復歸故國所以不願為之民也歟成公不知薄稅畝輕

力役修德政以來之而肆其兵力雖得之亦必失之

集說

趙氏匡曰凡內自圍者皆叛邑李氏廉曰春秋內叛書圍者七始於此昭十三年圍費二十

六年圍成定六年圍鄆十一年圍邱圍費十二年圍成

大雩

晉卻克衛孫良夫伐麇咎如

麇在良反公作將穀作牆咎音羔麇咎如杜注赤

狄別種

左傳

晉卻克衛孫良夫伐麇咎如潰上失民也討赤狄之餘焉麇咎如潰上失民也

集說

胡氏寧曰經不書麇咎如潰者晉常滅赤狄潞氏甲氏及留吁矣其餘黨散入麇咎如又欲盡

殄滅之非仁人之心也段紀明請滅羗種羗雖滅漢亦亡後世豈嘗絕羗患哉厲咎如潰削而不書聖人之情見矣家氏鉉翁曰克與良夫得志於寧不知自戢更為此舉春秋書之誅善戰也楚方躡藉中原晉人不務修明伯業圖其速者大者既滅潞氏又殄留吁以為未快復興此役此逐利之師春秋惡之屢書皆所以貶程氏端學曰晉不修德以綏諸侯攘彊楚而斃斃焉惟狄之務搜與國以伐之其為國可矣知

冬十有一月晉侯使荀庚來聘

晉來聘之始

衛侯使孫良夫來聘丙午及荀庚盟丁未及孫良夫盟

聘而遂盟之於是始

左傳

冬十一月晉侯使荀庚來聘且尋盟衛侯使孫良夫來聘且尋盟公問諸臧宣叔曰中行伯之

於晉也其位在三孫子之於衛也位為上卿將誰先對曰次國之上卿當大國之中當其下下當其上大夫小國之上卿當大國之下卿中當其上大夫下當其下大夫上下如是古之制也衛在晉不得為次國晉為盟主其將先之丙午盟晉丁未盟衛禮也

公羊

此聘也其言盟何聘而言盟者尋舊盟也

胡傳

其言及者公與之盟而不言公見二卿之抗也

集說

高氏閌曰庚晉之下卿良夫衛之上卿而魯人盟之先晉後衛豈非畏晉之彊乎李氏廉曰

聘而遂盟例五此年荀庚良夫十一年卻鞮襄七年林父十五年向戌

案庚與良夫聘且盟左氏公羊皆以為尋盟則是二臣之聘盟兩受君命非奉命來聘而擅及魯盟也劉氏敵以為專命生事者過矣又謂不繫於國以見遂事之辱不知奉使而來既書晉侯衛侯則及盟可不繫於晉衛也

鄭伐許

胡傳 晉楚爭鄭鄭兩事焉及邲之敗於是乎專意事楚晉雖加兵終莫之聽也至此一歲而再伐許甚矣夫不擇於義之可否以為去就又馮弱犯寡一歲之中而再動干戈於鄰國不既甚乎

集說 孔氏穎達曰直舉國名傳無其說知是告辭略故史異文耳賈逵云鄭小國與大國爭諸侯仍伐許不稱將帥刺無知也此年夏鄭公子去疾帥師伐許明年冬鄭伯伐許先後並無貶責何獨此伐偏

刺之家氏鉉翁曰鄭莊滅許自知不義置之而去
今襄公以兵加許歲至於再莊有悔過之心而裔孫
濟惡自是許卒為鄭所併

案蜀之盟諸侯從楚者多出於不得已若許若蔡國
小受脅不足責也鄭為畿內之國以邲之敗而叛晉
既伐衛又一歲再伐許故春秋惡之胡傳所謂不擇
於義以為去就而馮弱犯寡者也不書將帥孔氏穎
達從杜注以為告辭略而駁賈逵之說謂先後伐許
皆不貶責何以獨於此偏刺亦似有理今竝存之

附錄左傳十二月甲戌晉作六軍韓厥趙括鞅朔韓
穿荀騅趙旃皆為卿賞鞏之功也齊侯

朝於晉將授玉卻克趨進曰此行也君為婦人之笑
辱也寡君未之敢任晉侯享齊侯齊侯視韓厥韓厥
曰君知厥也乎齊侯曰服改矣韓厥登舉爵曰臣之
不敢愛死為兩君之在此堂也荀營之在楚也鄭

賈人有將寘諸褚中以出既謀之未行而楚人歸之
賈人如晉荀瑩善視之如實出已賈人曰吾無其功
敢有其實乎吾小人不
可以厚誣君子遂適齊

甲定王二
戌十年

四年

晉景十三年齊頃十二年衛定二年蔡
景五年鄭襄十八年曹宣八年陳成十

二年杞桓五十年宋共二
年秦桓十八年楚共四年

春宋公使華元來聘

左傳

四年春宋華元
來聘通嗣君也

集說

王氏葆曰宋入春秋未嘗聘魯文十一年公子
遂雖往而宋不報也華元之來其為共公謀昏

張本乎趙氏鵬飛曰禮諸侯世相朝所以繼好結
信春秋之世以彊弱為判齊晉大國宋不敢不朝匹

敵以下固未嘗朝聘已為腆矣聖人志之凡以志其任勢而廢禮也吳氏澂曰晉衛宋三國相繼來聘以三年春同會伐鄭交結和好也李氏廉曰經書宋聘魯始此終春秋宋聘魯四此年及八年華元襄十二年華定昭

三月壬申鄭伯堅卒

集說杜氏預曰壬申二月二十八日

杞伯來朝

左傳杞伯來朝歸叔姬故也

集說杜氏預曰將出叔姬先修朝禮言其故趙氏鵬飛曰叔姬不令於杞杞伯將出之彼直歸叔

姬則疑魯用叔姬之諷以疾於杞故先朝於魯而言其故焉故明年叔姬來歸

夏四月甲寅臧孫許卒

集說

汪氏克寬曰文仲之子宣叔也子紇嗣為大夫是為武仲

公如晉

左傳

夏公如晉晉侯見公不敬季文子曰晉侯必不免詩曰敬之敬之天維顯思命不易哉夫晉侯

之命在諸侯矣可不敬乎

集說

高氏閌曰公連歲如晉者以嘗即楚故也張氏洽曰晉景公勝齊而驕也汪氏克寬曰成

公此年朝晉而取辱豈非禮愈繁而身愈卑徒自屈而已耳

葬鄭襄公

集說汪氏克寬曰喪未五月葬之速也太不懷也
季氏本曰襄公卒二月而葬其速如此必襄公

以弟代兄其後嗣子有爭也觀悼公未逾年
而稱伯則必有故而汲汲於即位治喪矣

秋公至自晉

左傳秋公至自晉欲求成於楚而叛晉季文子曰不
可晉雖無道未可叛也國大臣睦而過於我諸

侯聽焉未可以貳史佚之志有之曰非我族類其
心必異楚雖大非吾族也其肯字我乎公乃止

集說家氏鉉翁曰甚哉魯成中無所主逐變而屢遷
也始與晉人連兵伐齊以有鞏之勝謂當與晉

為睦曾未幾月率先諸侯受盟於楚猶幸晉人之無
討也去年如晉今年又如晉正所以救前日匱盟之

過一不為所禮又將叛而即楚春秋
於魯成之從楚適晉備書以貶之也

冬城鄆

鄆公作運

集說

杜氏預曰公欲叛晉故城而為備趙氏鵬飛曰鄆即汶陽之一邑也以田言之曰汶陽以邑

言之曰鄆戴氏溪曰定公時齊歸鄆謹龜陰之田杜氏謂此三邑者汶陽之田也魯既得汶陽故城鄆

以自固家氏鉉翁曰鄆有三莒之別邑亦曰鄆九年楚人入鄆是也魯自有二鄆文十二年城諸及鄆此東鄆莒魯所爭者也成十六年公待於鄆此西鄆今此所城也春秋譏魯人不務安靜而輕於用民力

鄆雖城何益哉

案經書城鄆左氏無傳杜氏預以為備晉者因公之不禮於晉也戴氏溪謂魯得汶陽故城鄆以自固於

情事
亦近

鄭伯伐許

左傳

冬十一月鄭公孫中帥師疆許田許人敗諸展

荀首佐之士變佐上軍以救許伐鄭取汜祭楚子反
救鄭鄭伯與許男訟焉皇戌攝鄭伯之辭子反不能
決也曰君若辱在寡君寡君與其二三臣共聽兩君
之所欲成其可知也然側不足知二國之成

展陵杜注許地今在許州西北
許州境汜祭杜注鄭地成皋縣東有汜水案此

為二邑汜即成皋之汜祭即中牟之祭
亭周祭伯之邑也蓋此時已入於鄭矣

胡傳

悼公伐許稱爵何也喪未踰年以吉禮從金革
之事則忘親矣稱爵非美詞所以著其惡也

集說

董氏仲舒曰父卒未踰年即以喪舉師也春秋以為薄恩且失其子心其先君襄公伐喪叛盟

得罪諸侯繼其業者宜矜善以覆之今又重之父伐人喪子以喪伐人父不義於人子失恩於親也何

氏休曰未踰年君稱伯者樂成君位親自伐許故如其意以著其惡程子曰稱鄭伯見其不復為喪以

吉禮從戎家氏鉉翁曰父所為義已繼之為孝父挾楚之授陵暴小國歲再用師其子繼世而不能改

是之謂濟惡庸得為孝乎不書子而書爵絕之於名教也李氏廉曰鄭自隱十一年入許之後鄭許世

辭至此凡書於經者又四侵伐矣李氏本曰鄭介晉楚之間國尚不能自立而乃屢年用兵爭勝鄰國

豈固本保邦之道乎余氏光曰郭氏曰棄去歲鄭襄公伐許經書鄭伐許今年鄭悼公伐許經書鄭伯

伐許前此成公二年八月衛穆公速卒冬楚師鄭師侵衛三年夏鄭公子去疾帥師伐許凡此亦皆據舊

史而書之春秋立義雖不同不應於數年之中事同罪一或恕之於前或誅之於後參錯變亂聖人決不如此也

附錄左傳

晉趙嬰通於趙莊姬

乙定王二年五年

晉景十四年齊頃十三年衛定三年蔡景六年鄭悼公費元年曹宣九年陳成

十三年杞桓五十年宋共三年秦桓十九年楚共五年

春王正月杞叔姬來歸

穀梁

婦人之義嫁曰歸反曰來歸

胡傳

前書杞伯來朝左氏以為歸叔姬也此書杞叔姬來歸則出也春秋於內女其歸其出錄之詳

者男女居室人之大倫也男子生而願為之有室女子生而願為之有家父母之心人皆有之而不能為之擇家與室則夫婦之道苦淫僻之罪多矣王法所重人倫之本錄之詳也為世戒也

集說

何氏休曰始歸不書與鄭伯姬同孫氏復曰來歸者棄而來歸也黃氏仲炎曰杞叔姬見

出而來歸猶鄭伯姬也趙氏鵬飛曰內女見出皆曰來歸然罪惡不可以不辨故有歸之者有自歸者以見意齊人來歸子叔姬罪在齊也杞叔姬來歸罪在叔姬也叔姬自取出絕故以自歸為文雖姬之罪無所考而觀聖人所書之文則歸之者以見夫不夫自歸者以見婦不婦家氏鉉翁曰春秋之世倫分廢缺夫婦之道乖矣有出而允於義者有出而悖於禮者杞伯來朝之明年而後叔姬乃歸此與他悖義之出不同必叔姬自不安於杞非杞絕之也故其卒杞復逆喪以葬叔姬繫於杞義未絕也吳氏澂曰

疑是叔姬無子杞桓別有妾子為太子叔姬心不自
安而願歸魯故叔姬既卒而杞桓復來逆其喪以歸
也汪氏克寬曰叔姬始嫁不見於經與鄭伯姬同
婚姻得禮常事不書又曰鄭伯姬杞叔姬皆出而來
歸然叔姬書卒書杞伯逆喪以歸而鄭伯姬來歸
之後不復見於經則其善惡優劣不可以槩觀矣
附錄左傳春原屏放諸齊嬰曰我在故欒氏不作我
亡吾二昆其憂哉且人各有能有不能舍
我何害弗聽嬰夢天使謂已祭余余福女使問諸士
貞伯貞伯曰不識也既而告其人曰神福仁而禍淫
淫而無罰福也祭其得
亡乎祭之明日而亡

仲孫蔑如宋

左傳

孟獻子如宋
報華元也

集說

汪氏克寬曰茂興華元交相聘問其情厚矣而明年茂僑如逼於晉令遽興侵宋之師朝玉帛

而暮干戈謹於邦交者固如是乎

夏叔孫僑如會晉荀首于穀

首公作秀

左傳

夏晉荀首如齊逆女故宣伯餽諸穀

集說

高氏閔曰荀首逆女而僑如往饋之此之謂非禮之禮故以大夫會大夫書之鄭氏玉曰穀

齊地他國大夫非過吾境而使大夫會之非禮也若僑如私會則尤專恣之甚故謹而書之汪氏克寬

曰自文十一年彭生會卻缺宣十五年茂會高固自是大夫會大夫率以為常矣

梁山崩

梁山杜注在馮翊夏陽縣北詩奕奕梁山水經注河水又南逕梁山原是也夏陽今同州韓城

縣屬陝西
西安府

左傳

梁山崩晉侯以傳召伯宗伯宗辟重曰辟傳重人曰待我不如捷之速也問其所曰絳人也問

絳事焉曰梁山崩將召伯宗謀之問將若之何曰山有朽壤而崩可若何國主山川故山崩川竭君為之不舉降服乘縵徹樂出次祝幣史辭以禮焉其如此而已雖伯宗若之何伯宗請見之不可遂以告而從之

公羊

梁山者何河上之山也梁山崩何以書記異也何異爾大也何大爾梁山崩壅河三日不汧為

天下記
異也

穀梁

梁山崩壅遏河三日不流晉君召伯尊而問焉伯尊來遇輦者輦者不辟使車右下而鞭之輦

者曰所以鞭我者其取道遠矣伯尊下車而問焉曰
子有聞乎對曰梁山崩壅遏河三日不流伯尊曰君
為此召我也為之奈何輦者曰天有山天崩之天有
河天壅之雖召伯尊如之何伯尊由忠問焉輦者曰
君親素縞帥羣臣而哭之既而祠焉斯流矣伯尊至
君問之曰梁山崩壅遏河三日不流為之奈何伯尊
曰君親素縞帥羣臣而哭之既而祠焉斯
流矣孔子聞之曰伯尊其無績乎攘善也

胡傳

梁山韓國也詩曰奕奕梁山韓侯受命而謂之
韓奕者言奕然高大為韓國之鎮也後為晉所

滅而大夫韓氏以為邑焉書而不繫國者為天下記
異是以不言晉也左氏載絳人之語於禮文備矣而
未記其實也夫降服乘縵徹樂出次祝幣史辭六者
禮之文也古之遭變異而外為此文者必有恐懼修
省之心主於內若成湯以六事檢身高宗克正厥事
宣王側身修行欲銷去之是也徒舉其文而無實以

先之何足以弭災變乎夫國主山川至於崩竭當時諸侯未聞有戒心而修德也故自是而後六十年間弑君十有四亡國三十二其應亦懽矣春秋不明著其事應而事應具存其可忽諸

集說

杜氏預曰記異也

劉氏敞曰穀梁曰不日何

此文似云山有崩道崩不當書今以晉侯問伯宗故獨書也是豈春秋意耶高氏閔曰先王之制名山大川不以封梁山雖屬於韓而非諸侯正受封之地故春秋書梁山崩而不繫之國者為天下記異也是以不書晉夫國主山川豈特晉當之哉趙氏鵬飛曰梁山晉地也詩曰奕奕梁山蓋在韓侯之國韓滅於晉其地為晉晉侯及秦伯戰於韓是也梁山晉地而不繫之晉山崩川竭天下之大異天地不為一國而示變聖人亦豈為一國而書之天地示變以警人君聖人志之以示後世君人者觀此亦可以識天意

矣若取其事應以合之曰此梁山崩之驗是亦淫巫
瞽史之事非君子所欲聞也汪氏克寬曰春秋之
初晉滅韓曲沃莊伯之弟韓萬以為采邑又曰自此
至昭十六年凡六十年經書弑君惟晉州蒲齊光衛
剽吳餘祭蔡蔡固莒密州楚虔凡七滅國惟舒庸鄆萊
偃陽舒鳩賴陳蔡州來凡九耳故徐彥疏云注誤今
考文十一年敗狄于鹹何氏謂宣成以往弑君二十
八亡國四十證諸經亦不合抑并春秋所不書者言
之如穀梁三十四戰者歟邵氏寶曰春秋為天下
紀異者三梁山崩有星孛入於北斗西狩獲麟山斗
以異為異麟以祥為異以異為異者
亂世之常以祥為異者亂世之變

附錄左傳

許靈公愬鄭伯於楚六月鄭悼公如楚訟
不勝楚人執皇成及子國故鄭伯歸使公

子偃請成於晉秋八月鄭伯及晉趙同盟于垂棘
宋公子圍龜為質於楚而歸華元享之請鼓譟以出

鼓譟以復入曰習
攻華氏宋公殺之

秋大水

集說

張氏洽曰山崩
大水陰盛之徵

冬十有一月己酉天王崩

集說

孫氏復曰定王也 高氏閌
曰不書葬罪諸侯之不會也

十有二月己丑公會晉侯齊侯宋公衛侯鄭伯曹伯邾

子杞伯同盟于蟲牢

蟲牢杜注鄭地陳留封丘縣北有
桐牢今桐牢亭在河南開封府封

丘縣北
三里

左傳

冬同盟于蟲牢鄭服也諸侯謀復會宋公使向為人辭以子靈之難

胡傳

案左氏許靈公愬鄭伯於楚鄭伯如楚訟不勝歸而請成於晉盟于蟲牢鄭服也鄭服則何以

書同盟天王崩赴告已及在諸侯之策矣以所聞先後而奔喪禮也而九國諸侯會盟不廢故特書同盟以見其皆不臣

集說

何氏休曰約備彊楚杜氏預曰言同盟服異也杜氏諤曰晉齊序於宋上杞伯序於諸侯

之下者以彊弱為大小也孫氏復曰蟲牢之盟鄭服也天王崩晉合諸侯同盟于蟲牢不顧甚矣程

子曰天王崩而會盟不廢書同見其皆不臣趙氏鵬飛曰晉景即位十有五年矣蓋嘗為清丘斷道之

盟以求諸侯於時楚莊方張諸侯二三其德晉不能宗主也今蟲牢之會始能復振其勢且反鄭於久叛

雖未足以成桓文之功而志有足嘉也李氏廉曰
鄭自邲戰後皆從楚至此始從晉而晉人不能明尊
王之義以示之汲汲於要之以盟誓此所以竟不能
服鄭雖再救而卒無功也汪氏克寬曰是盟乃何
休所謂同心為惡惡必成者也蓋諸侯之同盟實有
同外楚之心而不知悖於尊王之義天子之喪人道
始終之大變諸侯相見揖讓入門而聞計則不得終
禮況已聞而猶相與會盟不亦無人心乎春秋之諸
侯不知有王故襄王方崩則晉魯之卿會盟王都之
側而不奔喪簡王方崩而邾與晉衛修朝聘於魯而
不修弔事蓋將以是為常而不知愧甚者靈王之計
音已達於天下而諸侯旅朝於荆楚且侯致襚執紼
越歲踰時而後返而曾不遣一介行李問國恤於京
師也吁可歎哉趙氏恒曰書同盟亦只是志同欲
之通例善惡則存乎其時乎非特為不臣而立此同
王崩之文而同盟豈其時乎

盟之
文也

案蟲牢之盟胡傳謂九國不知奔喪其議甚正然是時齊始從晉鄭以訟許不勝亦改而從晉晉為是盟以固諸侯之心亦復伯之機也趙氏鵬飛之說亦可竝存

欽定春秋傳說彙纂卷二十二